

१५५

दर्ता नं.:४८/२००६/७७

पुर्खा दयक तकगु सम्पत्ति, भीगु कला व संस्कृति  
पिकाक-भक्तपुर नगरपालिका



पुर्खा दयक तकगु सम्पत्ति, भीगु कला व संस्कृति

# झयया

नेपाल संवत् १९४५ चिल्ला गा: / २०८२ वैशाख १ / 2025 Apr. / ल्या: १२९, दौ:७

LOTUS RESTAURANT

Transition

ramalaya  
CELEBRATE WITH CHOCOLATE

धिरका जात्रा व  
ढहंगु वर्ष २०८२ या भिबुना

स्वप अस्पताल व स्वप बहुप्राविधिक्य् मिन्तुना ज्या इवः

(२०८१ चैत्र २३ गते)



लोकंहवागु खिस्का जात्रा तःजिक हानयता ब्यापु ढःपुं नपां बैठक

(२०८१ चैत्र १४ गते)



; DkfbSlo

@)\*@ a#fv !, c^a\$ !%%, jif&

## न्हूगुवर्ष २०८२ व बिस्का जात्राया भिन्तुना

थी थी न्यनय हायपुगु, म्हायपुगु अनुभवत त्वःत वि.सं. २०८१ भी नपां तापाक्क वान । खप नगरपालिकां नं न्हाथें हे याडः वगु शिक्षा, स्वास्थ्य, सुचुकुचुकासा, सम्पदा ल्यंकः म्वाकः भिंकः तय्गु थी थी ज्यात नपां लाहातय ज्या दैगु तालिमत बियगु ज्यात अज व्यवस्थित याडः बांलाकः हज्याकल ।

भिंंगु, बांलागु शिक्षा विइकेता इलय ब्यलय् शिक्षकपिन्ता तालिम, च्वय थ्यंकया उच्च शिक्षा ब्वनिपुं ब्वनामिपिन्ता शैक्षिक ऋण, थी थी विषयलय् विद्यावारिधितकया ब्वनामिपिन्ता छात्रवृति बियो वगुलिं थी थी विषयलय् च्वजाय्क ब्वनापिन्ता बांलागु मौका दत । थुगुसी हे खप नगरपालिकापाखं चाय्कः तःगु खप इन्जिनियरिड कलेजया ब्वनामिपुं पूर्वाञ्चल विश्वविद्यालयया ब्वनामिपुं मध्ये सर्वोक्ष्ट जुयता तःलात ।

खप नगरपालिकापाखं चाय्कः तःगु खप अस्पताल न्हू न्हूगु उपकरणत ताडः अज सुविधां जायकः हज्याडः च्वंगु दः । जनताता अःपुक स्वास्थ्य सुविधा बियगु तातुडः खप नगरपालिका वडा नं. १० य् हकनं छगू स्वास्थ्य केन्द्र चाय्कागु जुल । छँ छँ नर्सिडया व्यवस्था अज बांलाक यंकः फक्व मथां अलय् भिंकः स्वास्थ्य उपचारता हज्याकः यंकः च्वंगु दः ।

थुगुसी हे खप नगरपालिकां मंसिर २८ गतेनिसें पुस २ गतेतक 'खप महोत्सव-२०८१' तःजिक हान । डान्हूतक न्ह्याकगु उगु महोत्सवय् देशंदुनय्यं व देशपिनय्या थ्यं मथ्यं च्यागू लाखम्हा मनूतय्सं स्वःवगु अनुमानयागु दः ।

देशं दुनय् व देशं पिनय्या पर्यटकपिनिगु मन क्वसाय्केगु तातुडः यागु उगु महोत्सव खप नगरपालिकां थुगुसी यागु तस्कं बांलागु ज्या मध्ये छगू खः ।

कला, संस्कृति ल्यंकः म्वाकः तयगुलि हृदाय च्वडः ज्या याडः वगु खप नगरपालिकां सापारू गुन्हिपुन्हीबलय् क्यनिनु आधुनिक व परम्परागत (न्हूगु पुलांगु) प्याखं, ख्याल, छधाप्याखंया बिस्कं बिस्कं ल्यज्यायाडः सिरपा ब्यूगु नपां बाँसुरी बाजाया धिंधिबल्ला, परम्परागत सांस्कृतिक गुरुपिन्ता हानय्ज्या नपां न्हूगु पुस्ताता बाजा स्यनिपिन्ता आर्थिक ग्वाहालीयायां संस्कृति ल्यंकः, म्वाकः, भिंकः तय्गु महत्वपूर्ण ज्या थुगुसी नं यात ।

छम्हा छम्हा नागरिकपिनिगु जिउ उसाय्यं बांलाकः तय्ता ब्वनय्कुथि ब्यागु कासाया धिंधिबल्ला, नगरब्यागु 'अन्तर नगर कासाया धिंधिबल्ला नं यागु जुल । ब्वनय्कुथि ब्यागु कासाया धिंधिबल्लाखय नगरया ८२ गू ब्वनय्कुथिया २५०० म्हा ब्वनामिपुं स्वयो अपः सिनं ब्वतिकःगु धःगु दःसा अन्तर नगर जिम्नास्टिकया धिंधिबल्ला सं स्वंगू महानगरपालिका, छगू उपमहानगरपालिका नपां हिंच्यागू नगरपालिकां ब्वति कःगु खः । कासाया स्यनामिपिन्ता तालिम, मदिक्क कासा स्यनय्गु ज्या, त्वालय- त्वालय छिकोड स्यनय्ज्या नपां बेखाल कभर्डहल उलेज्या नपां चाय्के धुंगु कासा ख्यलय न्हिथानय् बहुगु ज्यात जुल ।

थुगुसी हे खप नगरपालिका वडा नं ५ या लक्ष्मी नरसिंहया देगः दानय्गु ज्या क्वचालसा त्वालय् त्वालय्या अपलं फल्चा, ल्वहँहिहि, पुखुत ल्हवनय्-कानय् व दानय्गु ज्या जुल । थंथु दरवार (पुनःनिर्माण) दानय्गु ज्या, बहु प्रतिक्षित अरनिको सभाभवन दानय्गु ज्या नपां भौतिक पूर्वाधार निर्माणया ज्या हज्याकल ।

ल्यासे ल्याम्होपिन्ता थःगु तुतिखय् दानय फय्केता लाहातय ज्या दैगु 'कुक्' तालिम, (ज्वरययाय्गु तालिम), साँ च्याकय्गू, बुँ दाय्गु, कम्प्यूटर, मोटरसाइकल ल्हवनय्गु, मोबाइल ल्हवनय्गु, प्लम्बिड, विद्युत जडान, सुज्या सुयगु, बेकरी, कृषिया तालिम थजगु, अपलं तालिमत ब्यूगु नपां चिनियाँ व जापानी भाय नं स्यनय्गु यागु जुल ।

निर्वाचनया इलय पार्टी घोषणापत्र पाखं जनताता बियागु बचं जनप्रतिनिधिपिसं छगू छगू यायां पूर्वांक वगु दः । ल्यं दःगु ज्या २०८२ सं पुवांकय्गु आशा नपां बिस्का जात्रा व न्हूगु वर्षया लसताय सकल नेपःमिपिन्ता दुनुगलं निसें भिन्तुना देछायो च्वडा ।

पिकाक-खप नगरपालिका/सम्पादक-आशाकुमार चिकंबञ्जार, डेस्कटप-धन लक्ष्मी त्यात, आवरण सज्जा-रेणु ध्वज्, थाकू- भक्तपुर अफसेट प्रिन्टर्स फोन ल्याः ०१-६६१३०४३, इ-मेल- khwopapau@gmail.com

# नुगलय स्याडः छँ त्वःतःम्हा मिजंयाता तिरी मयजुया इनाप

का. रोहित



**म्ह्याय्या ब्वा,**

जिं छिगु पौ इलय हे कायो ब्वनय् खान । पौ स्वयो जि चच्छि मिखा फुति हे याय मफया, न्ह्यो मव । म्ह्याय्य देने धुंक जि उखय् पाखय्या क्वथाय् वाड चच्छि हे खवया । सुथाय तिनि चाया- 'जिगु फवंगा फुक्कं प्याडः चवंगु' । सुथाय दाडः म्ह्याय्याता स्कूलय् छवया, जा हे मनसिं जि हकनं खवया । उखुनुं जि स्कूलय् ब्वंकनं मवाडा । न्हिनय्सिया २:०० ता इलय जि क्वथां प्याहाँ वयो भुथु (बैग) क्वथाय् वाडा । म्ह्याय्य नं नयो वांगु चिप कचौरा सिला । भ्याभाति हे पित्या मजु म्ह्याय्य स्कूलं ल्याहाँ वै बलय जा अथेंतुं ल्यं दःगु अलय जिं जा मनगु सिलकीं वयागु नुगः खवइ जक जिं छपे छपे जा नाखं घुतिडा । जिगु मिखालं खवबी मदी ।

छिं च्वयो तकगु पौ हकनं लिपिडः ब्वडा अलय हकनं खवया । मनमनं थौं तक जिं थःगु मनय लिकुंकः तयागु छगूकाथंया उकुसमुकुस व अपराधबोधया भावनात सुयातां कानय मफया अलय वहे अपराध बोधया भावनां जिगु मनय छगू काथं हिनता बोधं याडः जिता क्वचिडः यंकिगु अलय नुगलय् छुरिं सूर्थे पीडा छटपटी जुइगु । जिगु उगु मानसिक अवस्थाता छिगु हःनय् ब्वयगु साहस जिं याय् मफया । जिं थःगु कमजोरी तपुयता जिं छिता तं क्यनय्यगु अलय उकुस मुकुस पिज्वयक छ्वयमफयो जिके छगू काथंया वितृष्णा

अलय समस्या नपां ग्याडः अथेधाय् मथिइकेता थुस्स च्वनयगु बानी जुयो वल । अः यां पौ खानकीं म्हतिइ ई ब्रुयो वै थें जिता काथं मछिनिगु व भिं जुइगु खाँ सुननं न्हि जक थानय् वं हे जिगु मनय् छगू काथंया ममरु पहः पिज्वयो वैगु । थुकिता जिं पाडां पानय् मफयो जिगु म्हतुं खाँ पिल्वय धुंकिगु । अलय जिगु म्हतुं बाँमलागु खाँगवः त प्याहाँ वय धुंकिगु । उकिं हे छिकय् व मेपुं शिक्षक शिक्षिकापुं व पासापिन्के जिकय् काचाक्क अलय चाः हे मचाय्क प्याहाँ वैगु जिगु बोली व्यवहारं बाँमलागु लिचवः लाडः वान । गुब्लें गुब्लें जि याकचा च्वनय् बलय् श्व सास हे हः हः पांगु थजगु पहः तांकय्या कल्पना याय्यगु अलय उकिता व्यवहारय् छ्यलय्यगु उपाय व ई जिं लुइके हे मफुत । उकिं जिगु हे कमजोरी, जिगु हे (हिनताबोध) क्वतुगु मन व जिं हे तछ्याड धाय मफयागु खाँ खं याडः छि नपांया स्वापु भन भन तापागु थें जुयो वान । गुकिं छि आपासिकं दुःखगु परिस्थिति कः घाडः पौ च्वयमःगु ई पिज्वल । अथे जुगुया फुक्क दोष जि हे खः जिता जिं हे दोषी तायका छाय्धःसा नुतुसुतु हे मदय्कः मनमुताव अलय न्ह्याब्लें खवः खिउँक जुय मःगु लकस पिमज्वयकेता छिं छम्हा मिजं नं याय् मःगु व याय फँगु फुक्क उपायत व्यवहारत हेयकेगु व सहाय्यगु फुक्क फुक्क याडः द्यगु हे खः । जिं उकिता जिगु दुनुगलं निसें हे डाल काया । जिगु फुक्क मचः मगागु खाँ ज्यात जिकय् लुमाडः व । उकिं मथिइक जुयता अलय तस्कं सल्लाह व उपायत व्यवहारं दुनुगलं निसें छ्यलय्यगु वचन बिय, अलय तस्कं चित्त दुखय् जगु जिगु व्यवहारं छिता अलय छि पासापिन्ता गुलि नुगलय घःलाता अलय अपमानित जुयमाला उकिया नितिं जिं फुक्कसिकय् क्षमा फवनयता व पश्चाताप यायता नं तयार दः । अलय थव जिगु पौ छिगु लाहातय् लायवं हे छिं छँ ल्याहाँ भःसा जिं उलि नुगः मछिंक च्वनय मालि मखु । भ्नीगु सुखी परिवार धात्थें हे सुखी परिवार जुई । बरु म्ह्यायता किपा च्वयगुया छुं साफूत, कापी व सिसाकलम लुमांक ज्वडः भासैं । म्ह्याय्य नं छिगु खाँ बारम्वार न्यडं तुं च्वनिगु ।

धातुं जिता मनोचिकित्सकया सल्लाह कायमः धःगु तस्कं यो ताया । जिगु श्व तंचायगु, समस्या खाडः बिसे वानयगु बानी (गम्भिर) दुग्यंगु खायँ ध्यान मवानिगु स्वभाव, थः भिनयगु खाँ न्यनय् ममदयो निराश जुयो न्ह्योँ वैगु थजगु आलस्य थजगु जिगु कमजोरी, हीनताबोध व अपराध बोधया छगू नेगू खाँत हःनय् बवय ताडा ।

छँ या दकलय न्हापांम्हा म्ह्याय् मचा जुगुलीं चवय चवय धायो न्यासी चाचां हे जि तःहिक जुल । परीक्षा जुडबलय् छिं धायो द्युथें शिक्षक पिनिगु ग्वाहालीं हे जि न्हाप लाकः वयगु । गुकिं जि बवनयगुलि भन भन कमजोर जु जुं वान । प्रवेशिका (SLC) परीक्षासं ब्वा नं धायो हे नेम्हा प्यम्हा शिक्षकपुं जिता ग्वाहाली याय्ता तयो ब्यगु जुल । श्व खाँ शिक्षा अधिकारी व कार्यालयं नं मस्यगु मखु । गणित,


## सच्छिव ड्यडागुगु स्वप पौ. ब.छि पौ(पाक्षिक)

अंग्रेजी व विज्ञानया शिक्षकं जक मखु नेपाली शिक्षकं नपां जिता परीक्षासं ग्वाहाली याडः ब्यगु खः । इहिपा लिपा जि थुल, सङ्गत सिल, मेपुं नपां स्वयाबलय् थुल, परीक्षासं जि ब्वा व शिक्षक पिनिगु ग्वाहालीं याडागु ज्या मज्यगु ज्या जूगुलिं जि बवनयगुलि कमजोर जुल । अः वयो मनमनं जिता अपराध बोध जुयो च्वंगु दः । उकिं हे म्ह्याय्ता तापाक्क स्कूल ब्वंकयगु बः याडागु, धेबा मरुगुलिं याडः नं ।

छिता जिं हकनं मेगु गम्भिर खाँ कानय् ताडा गुकिया लिचवलं जि न्ह्याब्लें नाखं लिकायो तःम्हा डा थें फाताफाता पुलः चवडा । गुकिया लिचवं जिगु मनय् बाँमलागु लिचवः लालां वान । जि ब्वाया प्रभाव गां व जिल्लाय् तक दः धायगु छिं स्यगु हे जुल । जिमिगु गामय ताँ व लाँ द्यकः बलय् जि ब्वानं ठेकेदारकय् अथें धेबा कःगु जिगु मिखालं हे खाडागु खः । सञ्चालक समितिया नायो जूयो स्कूल भवन द्यकः बलय् नं अपाभट्टा व ज्यामितय्ता नपां मःक्वः ज्याला नपां मःगु ज्याला नं मब्यु । बैङ्कय् खाता खोलय् यासां जि ब्वा नं समाजसेवा पाखं ब्यगु धेबा नं ललमल थ्याडः मखुगु ल्याचा पिब्वयो धेबा नइगु । सुनं खाँ न्हि थांसा अमिता नं भाति भाति धेबा बियो म्हूतुप्वः तिकी गू । जि किजा ओभरसियर खः सरकारी मनूया चाकरी याडः हे वं जागिर नःगु खः । व नं ठेकेदार, साहु महाजन व हाकिमत नपां मिलय जुयो भ्रष्टाचार याइगु ।

श्व फुक्क फुक्क बाँमलागु ज्या खः धायगु खाँ इहिपां जुय धुकः छिकपिनिगु सङ्गतं थुइका । अजगु खाँ सिय धुनय वं हे छिक पिनिगु हःनयँ थःता अपराधी तायका । जि नेम्हा प्यम्हा पासापिनि ब्वा पुं नं सरकारी हाकिमत नपां मिलय जुयो मज्यु मज्युगु ज्यात याइगु । उकिया लिचवः काय, म्ह्यायपिन्के नं लात । उलिमध्ये सुं सुं अपराधी तय्के मेलय वाना । कायपुं मध्ये गुलिं यां यगायो सीता । गुलिं ज्यान व डकैती मुदाय लाडः अ केन्द्रीय कारागारय् कुडः तःगु दः । अमि मां ब्वा अः पश्चाताप याडः अ सीयला म्वायला जुइकः च्वंगु दः । श्व खाँ फुक्क च्वया बलय जिगु मन हे याउँसे च्वडः वांगु थें मति वान । अः मन सञ्चो जुइगु जिता विश्वास दः । पौ लाहातय् लायवं हे छँ ल्याहाँ भासँ । भीगु जीवन सुखमय नपां न्हूँ काथं जुइगु छिता बचं बिय ।

प्रायश्चित याडः च्वंम्हा छिम्हा जहान



# राजनैतिक दलया कानून हिलय्गु प्रस्तावः पञ्चायती प्रेतात्मा थाड हय्गु न्ह्युगु पहः

विवेक

निर्वाचन आयोगं राजनीतिक दलसम्बन्धी ऐन २०७३ ता ल्हवड हिङ्केगु विधेयकया मस्यौदा प्रस्ताव हछ्याय् हल । आयोगं प्रतिनिधिसभाया निर्वाचनय् समानुपातिक निर्वाचन प्रणाली पाखय् क्वववागु सदरमतया म्हवचाखय् तीन प्रतिशत मत, प्रतिनिधिसभाया प्रत्यक्षपाखय् ७० प्रतिशत उम्मदेवारी व प्रदेशय् म्हवचाखय् नं छगू छगू सीट त्याकगु, छगू छगू प्रदेशय् प्रदेश समिति, छगू छगू जिल्लाय् जिल्ला समिति व स्थानीय तहलय् म्हवचाखय् सच्छिखय् चयब्व स्थानीय तहखय् समिति निःस्वासां जक राष्ट्रिय दलया मान्यता दैगु व्यवस्थाया प्रस्ताव यागु दः । (ऐनया दफा ५२ संशोधन प्रस्ताव)

अःयाय्गु राजनैतिक दलय् तीन प्रतिशत मत व प्रत्यक्ष पाखय् छगू सीट त्याकगु राजनैतिक दलं जक राष्ट्रिय मान्यता दैगु प्रावधान दः । मतसीमा (श्रेस होल्ड) प्रजातन्त्रया भावनाया अखःगु सर्त जुगुलिं उकिता खारेज याकय्ता नेपाल मजदुर किसान पार्टी नपां अपलं दलतयसं विरोध याडः वगु खः । मतसीमां याडः हे माधव कुमार नेपाल न्ह्यलुवाया एकीकृत समाजवादी पार्टी प्रत्यक्ष पाखय् हिगू सीट त्याकसां राष्ट्रिय दलया मान्यता काय मफः । डर, धम्की, ख्याचवः बियो, भ्रँनकः, धेवा वा मे मेगु लोभ क्यडः कःगु मतता राष्ट्रिय पार्टीया मापदण्ड दय्केगु गलत ज्या खः ।

नेका, एमाले थजपुं शासक दलतयसं नेपालय् बहुदलया नामय् नेगू दलया तानाशाही याय्गु मति तयो च्वना । उगु दलतयसं मतसीमा (श्रेस होल्ड) तीन प्रतिशतय ताडः पाँच प्रतिशत याय् मसि व । अः अमिसं निर्वाचन आयोगता हचिकः च्वंगू दः । अमिगु ध्यान न्हँ न्हँगु बिचः ज्वडः वपुं पार्टीतयता थामकाय्गुलि लाडः च्वंगु दः । लिपाया चरणय् निर्वाचन आयोगं

प्रस्ताव यागु थी थी प्रावधानत नं नेपालय् नेगू दलया तानाशाही लाडय् याय्गु शासक दलतय्गु कुतःया कथहं खः ।

वांगु संघ व प्रदेश सभाया निर्वाचनय् दकलय न्हःपां ब्वतिकःगु राष्ट्रिय स्वतन्त्रपार्टी २१ गू सीट त्याकला । स्वतन्त्र पार्टी पुँजीवादी वा समाजवादी छु बिचः ज्वडः हज्याम्हा खः छु हे सिय मरु । वयागु बिचः व सिद्धांत नं सिय मरु । निर्वाचनया लिचवलं नेका, एमाले व माओवादी थजपुं शासक दलत खाडः असन्तुष्ट जुयो स्वतन्त्र पार्टीता मत ब्यगु प्रस्ट सिय दः । थव नेका, एमाले व माओवादी मथुगु खाँ मखु । स्वतन्त्र पार्टी प्रदेश निर्वाचनय ब्वति कःगु हे मरु । न्हँगु बिचः व सिद्धांत कः घाडः च्वंगु मेगु दलत पलिसा काथं वयफःगु सम्भावनाया लौपु तियगु मतिं हे राजनैतिक दल सम्बन्धीया विधेयक हिलय्तांगु खानय् दः ।

प्रादेशिक पार्टीया मान्यता काय्ता नं प्रदेश सभाय् नं समानुपातिक पाखय् ३ प्रतिशत मत काय मःगु, प्रत्यक्ष पाखय् म्हवचाखय् नं ७० प्रतिशत उम्मदेवारी बियमःगु नपां म्हवचा खय् नं छम्हा उम्मदेवार त्याकय् मःगु अलय प्रदेश समिति, छगू छगू जिल्लाय् जिल्ला समिति व स्थानीय तहलय् म्हवचाखय् ८० प्रतिशत स्थानीय समिति दःगु दलता जक प्रादेशिक पार्टीया मान्यता बियगु प्रस्ताव यागु दः (मूल ऐनया दफा ५२ खय् संशोधन) अः प्रदेश सभाय् डेढ प्रतिशत मत कःगु व छगू सीट त्याकलसा प्रादेशिक पार्टीया मान्यता दैगु व्यवस्था दः । थवनं न्हँगु राजनैतिक दलतयता अस्तित्वखय हे वय मफयकेगु अलय अः कायम जुयो च्वंगु दलतयता नं न्ह्यो छ्वय्गु मेगु जः खः ।

अःनिर्वाचन आयोग राज्य कोषपाखं निर्वाचन खर्च काय्गु प्रस्ताव नं याडः च्वंगु

दः । (ऐनया दफा ३८ क थप) राजनैतिक दलया वित्तीय पारदर्शिताया लागिं राज्यकोषं गवाहलीया प्रस्ताव यागु प्रमुख निर्वाचन आयुक्त दिनेश थपलियां धःगु खः । राज्यकोषं 'राष्ट्रिय मान्यता कायो तःगु दलतयता आर्थिक अनुदानया व्यवस्था याय् वं हे शासक दलपिसं यत्थे चन्दा काय्गु त्वःति मखु निर्वाचनय् वडाध्यक्षं लाखौ, मेयर, उपमेयर व सांसदपिसं करोडौं खर्च याडः चुनाव ल्वागु खाँ प्याहा वयो च्वंगु दः । अथे खर्च याडः त्याकय्गु बानी जुय धुपुं राजनैतिक कार्यकर्तातयसं धेवा खर्च मयासें चुनाव ल्वाइगु सम्भावना हे मरु । शासक दलतयसं राज्यकोषं अनुदान नं काय्गु अलय तस्कर भ्रष्टाचारी व व्यापारीपाखं अकुट (ल्याचा हे मदयक) चन्दा नं काय्गु थजगु नेखरं क्वाय्गु आर्थिक स्रोत मुनय्गु मौका जक जुइ । दलतयता राज्यकोषं गवाहलीयाय्गु विषय मज्यगु जक मखु, उकिं देशय् पोडः वांगु दुकुटी अझ बोझ कुबिडकिगु नपाँ टाट पल्टय् जुय तांगु अर्थतन्त्रता अपः कमजोर याय्गु ज्या याई ।

राजनैतिक दल दर्ता याय्ता डसम्हा दुजःपुं दयमःगु अलय स्वब्वय् छव्व मिसापुं दुजः दयमःगु प्रस्ताव नं ब्यावहारिक मजु । पार्टीया दुजः पार्टीया बिचः व सिद्धान्त थूपिन्ता जक बिई । ता ई तक स्वयो, थी थी जनवर्गीय संगठनय् निश्चित ई तक ज्या यापुं अलय परीक्षण काल पू वांकपिन्ताजक कम्युनिष्ट पार्टीया दुजः याई । पार्टीया स्वब्वय् छव्व मिसामस्त दुजः जुय मःगु खाँ खं सैद्धान्तिक स्तर मरूपिता नं दुजः याय्ता राजनैतिक दलत बाध्य जुई । गुकिं राजनैतिक दलय् अझ बाँमलागु विकृति द्रुहं वय फः ।

छुनं राजनैतिक दल संघ, प्रदेश व स्थानीय तहलय् ब्वति मकायव अजगु दलया दलदर्ता खारेज याय्गु तकया प्रस्ताव नं यागु

खानय दः । राजनैतिक दलतयसं चुनावय् भाग कायगु वा बहिष्कार यायगु अमिगु स्वतन्त्रताया विषय खः । छुं नं दलतयता चुनावय् भाग मकसिं मगा जक धाय् दैमखु । अथे यायगु राजनैतिक स्वतन्त्रता लाकः कायगु थें खः । राजनैतिक दलतयसं थःथः गु बिचः व सिद्धान्त जनताया हःनय् तयके मब्यसां उकीं विद्वेह ल्यं थानि । छगू छगू राजनैतिक दलतयता थमनं कः घाडः वयागु सिद्धान्त, विचः व दर्शन जनताया हःनय् शान्तिपूर्ण काथं तयगु लकस राज्यं बियमः ।

निर्वाचन आयोगं पार्टीया घोषणापत्र काथं ज्या सांगु दःला, मरूला, मदिक्क पार्टीया ख्वः पौ पिथांगु दःला मरूला, जनताता ब्यगु बचं काथं जनताता चेतनास्तर थाकाइगु ज्या याडः च्वंगु दःला मरूला स्वयो अथे मयागु पार्टीतयता दर्ता खारेज यागु बन्दोवस्त कानुनय् दयमः । निर्वाचन आयोग नेका व एमालेया पार्टीया कचा थें जुय मज्यु ।

राजनैतिक दल सम्बन्धी ऐनय् ई काथं हिलय यंकय माली । अथे हिलः यंकयबल्य जनताया राजनैतिक अधिकार पक्का यायगु व अःपुकः राजनैतिक अधिकार छ्यलय्फैगु जुयमः । प्रजातन्त्रया नामय् जनताया अधिकार ध्याक्व कुलामय स्वथाडः यंकयगु छुं नं ज्या नेपःमिपिसं डाल काय फैमखु । राजनैतिक स्वतन्त्रताया अर्थ नेगू वा स्वंगू दलं जक राजनैतिक ज्या इवः त याय् दैगु मखु । वयां पञ्चायती निरंकुशताया मेगु ख्वः पा जक खः । पञ्चायती व्यवस्था निर्दलीय धःसां नं व एकदलीय व्यवस्था खः । अः बहुदलया नामय् नेगू दलया तानाशाही चियता जगू दः । म्हेगः यायपुं पञ्चत व थौया बहुदलवादी नेका व एमालेख्य छु हे पाता जक ?

**बिचः तयके मबियगु ज्या वा संघीयता भिंकः छ्यलय्गु गुगु हदाय तयो ज्या सानयगु ?**

नेका, एमाले व माओवादीत पालं पः शासन सत्ताय वाडः जनताता शासन व शोषण यागुलिं जनतात वाक्कदिक्क जुयो च्वंगु

खः । गणतन्त्र निस्वांगु हिडादा-नीदा दय्धुंकां अमिसं जनताता भिं यायगु ज्या मया । अमिसं गणतन्त्रिक व्यवस्थाय् न्हापा स्वयो जनताता बांलाकः सुविधा बियागु दः धायगु मनय् वांकः बिय हे मफः । गुकीं जनतातय् मन क्वातुडः वान । शासक दलपाखं निराशपुं जनतात मेमेगु पलिसाया दल मः जुइगु धात्थेगु खाँ हे जुल । राजनैतिक दल सम्बन्धीया कानुनत हिलः न्ह्युं दलत हःनय् वयके मबियगु काथं निर्वाचन ऐन हिलयगु प्रस्ताव हःगु सिय दः । गुकिं अः राजावादीतयसं कप ल्हाडः हःगु जुल ।

नेपालय संघीय व्यवस्था निः स्वानय् धुंकः उकिता बांलाक हछ्याय्ता दलतयसं बिचः यायमःगु खः । न्ह्युं संविधान वय धुंकः संघीय संरचनासं नेकः नेकः चुनाव जुय धुंकल । अथेनं अः तक अपलं अधिकारत केन्द्रं थःगु लाहातय् तयो तला । केन्द्रया अधिकार प्रदेश व स्थानीय तहख्य थयंकयता हे संघीयता निःस्वांगु खः । नेपःया संविधानं वियोतःगु अधिकार छ्यलय्ता तक नं प्रदेश व स्थानीय तहं संघ सरकार नपां ल्वाय मःगु अवस्था दः । थुकीं नेपालय संघीयता हे खःला मखूला धायगु न्ह्यसः दाडः च्वंगु दः ।

नेपालय राजनैतिक संघीयता जक जुल, वितीय व प्रशासनिक संघीयता मजुला दक सःश्वयकः वयो च्वंगु दः । राजश्वया पहः स्वयगु खःसा संध्य ८१ प्रतिशत, प्रदेशय ८ प्रतिशत व स्थानीय खय् ११ प्रतिशत खानय् दः । (महालेखापरीक्षक) थुकिं अजनं राजश्वया अपलं ब्व केन्द्रय हे दः धायगु कयं । खर्च नं संघं ७० प्रतिशत, प्रदेशं ९ प्रतिशत व स्थानीय प्रदेशं २१ प्रतिशत याइगु क्यडःतःगु दः । आमदानी व खर्चया अपलं ब्वः केन्द्रय लाकःतःतलय् संघीयता बांलाक छ्यलय् फैमखु । छु धात्थे सरकारं थजगु खायँ हदाय तयो ज्या सानय् मःगु मखुला ?

संघीयता छ्यलय्गु थुगु इवल्य निजामती सेवा, शिक्षा प्रहरी ऐन मवनि । गुकीं देशय् अन्योल जुयो च्वंगु दः । २०२८ सालया शिक्षा ऐन काथं देशां देछिया ब्वनय कुथित न्ह्याकः च्वंगु दः । संविधानं हिन्त्यगु

तगितकया छुपुतलं अधिकार स्थानीय तहता बियो तः गु दः । भीपुं मन्त्रीतयसं शिक्षक महासंघनपां संविधानया अखः सम्भौता यागु दः । संसदय् पिब्वगु शिक्षा विधेयकय् १७०० गू स्वयो अपः हिलय् मःगु प्रस्ताव प्याहाँ वगु दः । संविधान काथं हज्याय्गु लाकि शिक्षा मन्त्रीयागु सम्भौता काथं धायगु खायँ अः शिक्षा समितिया दुजःपुं छु याय् छुयाय् जुयो च्वंगु समितिया नायो अमर बहादुर थापां धायो च्वंगु दः । प्रदेशय् प्रहरी हे मरूथाय् गृहमन्त्रीया ज्या छु जुई ? वयागु हैसियत छु दै ?

भीपुं शासकदलत फुक्क मिलय जुयो निःस्वांगु संघीय गणतन्त्रात्मक व्यवस्थां फक्क जनताया भिं जुइगु ज्या यायता मः काथंया ऐन कानुनत दयकेगुलि बिचः याय् मः । सर्पया म्हीतिइ लाडः च्वंम्हा ब्याईचां बुईचा लाड नः थें देशय् गणतन्त्रया विरोध्य जुजुवादी तयसं विद्वेहया सलं जनताता क्वाकः हल । नेका व एमालेत धःसा गथे देशय् मेगु दलत थाता महयगु धायगुलि लाडः च्वंगु दः । थुकिता हे धाइगु क-विनाश कालय् विपरित बुद्धि ।

नेपःमि पिसं बिचः सिद्धान्त व दर्शनया लिधंसाय राजनैतिक ज्या इवः न्ह्याकय् दयकेगु स्वतन्त्रताया लागिं देशय् दलीय व्यवस्था व २४० दौं या राजतन्त्र ल्यं थाडः गणतन्त्र निःस्वांगु खः । गणतन्त्र निः स्वानय् धुंकः यक्व यक्व जुजुचापुं खानय् दयो वला दक द्रुपं बियो च्वंगु इलय् नेका व एमालेया गाथी सरकारं याडः च्वंगु ज्याखं खः धायगु पहः क्यडः च्वंगु दः ।

अः राजनैतिक दल सम्बन्धी कानुनय हिलयगु मखु, संघीयता भिंकः छ्यलय्ता मः काथंया कानुनत हदाय तय हयमः । इलय् हे मः काथंया कानुनत दयकः प्रदेश व स्थानीय तहं संविधानं क्यडः तःगु अधिकारत छ्यलय् दःसा अः स्वयो जनतां मथां मथां अःपुकः सेवा दःगु मति तय दै । सिंहदरवारय् लिकुंकः तयां संघीयताया छुं नं अर्थ दैमखु । प्रदेश व स्थानीय तहता बल्लाक अलय् सक्षम यायता मः काथंया कानुन दयकेगुलि सरकारं हदाय तयो ज्या सानय् मः ।

# खपया लोकंहवागु बिस्का जात्रा महासिइका

आशा कुमार चिकंबजार



चैत्र महिना धुं धुं वैशाख महिना कयं कयं वैगु छगू जात्रा खः बिस्का जात्रा । बिस्काया बिस्कं पहः जक मखु थुकिया बिस्कं महासिइका, बिस्कं विशेषता अलय छगू दुकुलु दःगु संस्कार संस्कृतिया खोल नं दः । गुलिं दुगुडः स्वता उलि आनन्द वैगु अलय गनां छुं त्वः फिलाला ? गनां छुं चवय मगानिला धाय्थें च्वंकः वइगु थुगु वसन्तया रसबस नपां धे धे चुइकः लुइगु भैलखः या बिस्कं पहः नपां ल्योसिं द्यो थानिगुया छप्पा छधिया प्रतीक दुनय अपलं विशेषता कयच्याड, च्वंगू खाँ अनुसन्धानया इवलय विद्वानपिसं थः थःगु बिचः प्वंकः च्वंगु दः । किम्बदन्तीया पुसा चायकः, लोकोक्तिया बास त्व त्वं, मिथक ल्वाकः छ्या छ्यां छगू बिस्कं सबः कायो च्वंगु थुगु नखाया खायँ इतिहासया लिधंसाय स्वयो अपलं विश्वास समाजय ल्यंकः तयो तःगु न्यँकँ बाखं या लिधंसाय माकुक न्यडः च्वनि, छम्हा छुं हे मस्युम्हा शिष्यं थें । पत्या याय मफूसां पत्या जुयोच्वनि छगू वैद्य वास थें म्हेगया इलय जुल जुइकः छुं धायो । उकिं लोक जीवनय लोक साहित्यं कयंगु लाँपु ज्वडः संस्कृतिया पलं दुनय थःता कुंकः च्वनि यःक नं अलय थः

हे कुँ वानि मयः कनं ।

इतिहासया ल्वहँ पौ धस्वाड च्वनि छगू बौद्धिक समाजया मिखालय । गुकिया लिधंसा काइगु खयानं समाजय हाँगः कायो च्वंगु लोक संस्कृतिया घःमा कयलः च्वंगु समाजया पुंलांगु लाँपुति वाचिंगयो च्वंगु वहे बाज्याँ काडः तकगु म्हेगया मखुथें च्वंसां खः भः पियो च्वंगु बाखं दुनय मनूत थः तः कयडः च्वनि अलय वहे बाखं नं थःता तः कें कः तै । अलय जात्रा दुनय दुवालः स्वय बलय ल्योसिं द्यो न्हःपां थानाला ? वा भैलखः न्हपां दयकलाला धाय्गु न्हयसः नं मवै धाय् थाकु । अलय नेगुं नपां हे यागु नं जुय फः धाय्गु नं तर्क तय फः । उकिं जिं थाना याडागु तर्क केवल छम्हा लोक साहित्यया ब्वनामिया मिखालं स्वयागु जक खः । छिं नं थःगु तर्क तय फैं । उकिं जात्रा पुखां त्वः त तकगु खः । भीसं डायकः वयो च्वडा । थुइकं नं मथुइक नं थःगु जीवन नपां स्वाडः थःगु भः पियो थःगु महासिइका पिबवयो वयो च्वडा ।

किम्बदन्तीया लिधंसाय धाय्गु खःसा खपया लाय्कुलि महारानी नपां द्योम्हा जुजु कन्हे खुनुं सीगु घटनां जनता दिक्क

## सच्छिव इयडागुगु स्वप पौ. ब.छि पौ(पाक्षिक)

जुयो च्वंगु जुल । सीगुया कारण धःसा लुइके मफयो अजु चायो च्वंपुं दरवारया भारदारपुं अलय पिनय च्वडः थथेला धायो कल्पना याड च्वंपुं जनता तयगु मनं थथे हे जक धाय मफूत । स्वयम लानीं नं थथे हे जक धाय मफः । अलय उकिया खाँ पत्ता लगय यायता छम्हा परदेशी भिसिं द्यो जुयो वगु अलय भिसिंद्यो व परदेशीं उगु दरवारया लाँपु न्यं बलय गलसीपुखु पाखय क्यडः छ्वगु, आना थ्येबलय फ्ल्चाय फेतुड च्वम्हा नकिंजु अजिमा धःम्हा (भद्रकाली माजु) छम्हा बुही नं लाँपु क्यडः छ्वगु नं छताजिया धापु दः । गनां खलाँया लाँपु वांगु नं धाइपुं दः । वहे परदेशी (सु, गनानं वम्हा धायगु) निश्चित खाँ मरुम्हा मनूनं रानी नपां द्यो वांबलय थाना छुं नं छुं अवश्य रहस्य दै धायगु मति तयो मदेसिं तरवार ज्वडः जाग्राम च्वडः च्वंगु इलय लानीया न्हासं सांगु गवः छिया सर्प प्याहाँ वयो अपुं तःहिक जुजुं यक्व तहिडः लानी नपां द्यो वैम्हा जुजुयाता स्याडः दुमजु पुखुली म्वेः ल्हयो लानीया न्हासं तुं द्रहँवाडः च्वनिगु खाँ सिडकः वहे परदेशीं व विं (सर्प) ता क्वचा क्वचा थयो स्याडः ब्यूगु खाँ हनय तय है । अलय साति खुनं स्वः वांपुं भारदारतयसं जुजु मसीगु अलय बरु विं (नाग/नागिन नं धाई) स्याडः तःगु खाँ थुइकः वहे सर्प याता क्वचा स्वाड छमा तःमागु थासिमाय यखायो क्यडः तःगुया प्रतीक ल्योसिं द्यो व हलिंपतया जोडा धायोन्यकः वयो च्वंगु खः । वहे अद्भूत घटना बयबय जूसेलिं संसारया मनूत अजुचायो स्वः वगु इलय काशीया विश्वनाथ नं स्वः वगु खाँ स्वाय है । वहे काशी विश्वनाथ धायगु सिडकः वयाता ख्वपय सं तयो तय माली धायगु मतिं तान्त्रिक घेरा बियो ज्वनय तां सेलिं बायँ सं तुसुडः वानय तांगु इलय हथायसं कपः इजी खं लयो कःगु धायो तःगु दः । गुकि ख्वपया नेव तयसं इजी खं ला ताइ मखु । ता सा भैल द्योया कपः ध्यडागु पाप लाइ जक नं धाइपुं अःतक दःनी । न्हाथय थः जुयो ब्यू ५५ कु हाकम्हा ल्योसिं थानि । गुकिता ल्योसिं गुडै वाडः दुगुचां च्वयो ल्योगु सिं, ल्योसिं धायगु खाँवः ज्याडः उकिता हे च्यापु वलं तयो थानयगु याई । गुकिया अर्थ अष्टमातृका दक नं धायो च्वंगु दः । प्रशङ्ग नागनागिनया टुक्रा ह्वडः यखायो क्यनयता थांगु ल्योसिं धायो तःसां उगु ल्योसिंद्यो जुयो चैत्र मसान्त (३०/३१ गते) दाडः वै छगू उल्लास ब्वयो अलय मेगु वर्षया १ गते क्वथै छगू दाँ क्वचःगु संकेत काथं ।

ल्योसिंद्यो थाय् थासय् अथेधाय् यँ, सांगा, टोखा, थिमि थांसां मू ल्योसिं द्यो ख्वपया ल्योसिख्यलय हे थानि । गोपाल चित्रकार जुं धायो द्यूकाथं थव विजय ध्वज खः । हलिंपतः सर्प वा बिंया प्रतीक मखु । उकिं बिस्का जात्रा नपां विजय ध्वजोत्थानम जक नं धायो च्वंगु दः । भाजु तेजेश्वरबाबु ग्वंगःया धःसा

थुकिया बिस्कं धापु धायो च्वंगु दः । ल्योसिं गः मिसातयगु प्रतिक योनी व ल्योसिं लिङ्ग काथं खाँ पिबवसे वसन्तया ई रतिराग व वसन्तया इलयया जौवन दासें वैगुलिं वडगु शारीरिक परिवर्तनया प्रतीक काथं समागम धायो च्वंगु दः ।

अथेहे ख्वपया तालाक्व त्वाल्य लाहा मरुम्हा ल्योसिंद्यो नं कुम्ह दाजुपिसं थानी । किम्बदन्तीया धापु काथं लाहामरुम्हा ल्योसिंद्यो वं 'ला' खुयो नःगुलिं लाहा त्वाल्हाडः ब्यूगु खाँ नपां छगू इलय लाहातयो थां बलय मदांगु खाँ न्यनय दः । उकीं ल्योसिं थानिगु छगु उल्लास व उत्साहया चिंजक खः । गुकीं छगू काथंया वसन्तया बिदाइया खाँ नं दः धायफः । गुकि लाहा व कपालय् तैगु वंगुघांजा गाडः वसन्त क्वचगुया प्रतीक मखु नं धाय मछिं । उकिं संस्कृतिविद सत्य मोहन जोशी जुं थुगुइलय - 'मेसिनं सु मनल, क्वभांगं विरहया म्यँ हाल

ए क्व भांग, छ छु विरही छ स्वयो जिहे विरही ॥'

धात्थे वसन्तया रसराग फुडः ताल्ला तः नुया धनुष ज्वडः ताण्डव मचय्यो वैगु ई, चाकलिं भुजिं भुडः लकस हे, गखेसं च्वडः वाउँगु छ्वमा नं बुलुहँ गाडः वानिगु जक मखु म्हाय पुयो छथाय वानय् मःम्हा मेथाय् वाडः भूमीं यंकिगु ई काथं प्रकृतिया पहः खानय् दैगुया प्रतीक काथं काय फैला ! अथेयां ज्योतिष भाजु- कायष्ठ जुं चा व न्हि बराबर जुइगु उकिं ल्योसिया लाहायाता तप्यकः तयो बराबरया चिं दक नं धायो द्यूगु दः । थुकाथं भौगोलिक खाँ जक मखु ल्योसिंद्योया कपः गुखय् धेचुला उखय् निसें वःगाड वा पिज्या उखय् निसें याय् दैगु नं भविष्य वाणी याइगु ख्वपया बुहापाकाया धापु अः नं दः । वहे काथं वलाग सिमाय नं चुलि जाइगु नं विश्वास याई ।

ल्योसिं दानय् धुकः त्वाल्य-त्वाल्यया दाफा भजन हाली । सम्हय बजीन नं द्योया भाव भक्ति याई । भक्तिधाराया म्यँ नपां घातु म्यँ नं हाली । घातु लयया थी थी काथंया दःसां नं ख्वपया अन्तिम जुजु रणजित मल्लया च्वसां पिज्वगु धःगु म्यँ नं उलि हे लोकं हवा -

थो थें जागु रस गुब्ले नं दै मखु

राम हँ जि गना वाने

गना वानय गना च्वनय

सुयाय भरय च्वनय् दैव

दैबया भरय च्वनय

जिता तरे मजु रे दैब ॥ राम हँ --- ।

माम मदु बुब मदु

सुयाय भरे च्वनय दैब

जवय स्वसा दाजु मरु

खबय स्वसा किजा मरु  
जि पापी अभागी  
गना बना सीय रे दैब । राम हँ ॥  
तः पुखु नःपुखु स्वय धका  
डा जन्म काया रे दैब  
चण्डालम्हा खयया लाहातय्  
जालं कयंका स्यात रे दैब ॥ राम हँ ॥

डातापोलहँ स्वय धका  
बखुं जन्म काया दैब  
चण्डालम्हा खयया मचां  
तुबं कयंका स्यात रे दैब ॥ राम हँ ॥  
ल्योसिं खयलय ल्योसिं थान  
चुपिंगालय म्वलः ल्हूय  
वया चवय भइरब  
दरसन याय प्रभु ॥ राम हँ ।

थुकाथं ल्योसिं थानकीं भैरब, भद्रकाली दरसन याडः



## सच्छिव ड्यडागुगु स्वप पौ, बःछि पौ(पाक्षिक)

ल्योसिंघो दरसन याडः चुपिं गालय् ख्वः सिलः छँ वैगु चलन  
दः ।

**मैलखः**

बिस्का जात्राया छगू स्वयं हायंपुगु खः भैलखः खः ।  
स्वता प्वलहँ दःगु तस्कं कलात्मक सिंया बुट्टां जःगु, काष्ठकलाया  
छगु नमुना भैलखतय् भैल द्यो व बेतद्योया विराजमान याई । द्यो  
क्वहँ बिज्याइगु धायो चैत्रया अन्तिम दिनया प्यन्हँ हॉ थुगु भैलखतय्  
बेतद्यो अँसिखय् विज्याकी ।

**बेतद्योः**

बेतद्योया द्यो छँ थुम्हा द्यो हारांम्हा वा उपद्र याइम्हा  
धायो चिडः तै । अलय बिस्का वय लच्छिति हॉ धःसा थुम्हा  
द्योता फ्यनि । अलय थुम्हा बेतः द्यो चाह्यू वयो क्वफवाड घःपः,  
याइगु नं विश्वास याडः तःगु दः । उकिं थुगु इलय स्वन्हः चवय  
अपलं मचवनयता, कःसि इयालं ता ई क्वस्वयो मचवनयता अजि  
बाज्या पिसं धायो च्वनि । सायद चिकुलां कयकुडः च्वंगु जिवय्  
वसन्तया लुमुजलं चलपता दांकः जुइगुलिं घःपः जुई धायो थुकाथं  
धायो तःगु नं जुयफः । अलय थुगु इलय हलिंपतःया तेपय् हलिंपतः  
नं सानिगु धायगु नं आनाया अजि बाज्यापिसं धःगु न्यनय् दः ।

**मैलद्यो**

कपः जक ध्यडः कःम्हा भैल द्योया कपः जक खतय्  
दुनय् दथिमथि लाक बिज्याकी । काशी विश्वनाथया कपः ध्यडः  
कःगु धायगु विश्वास काथं भैलद्योया कपः या मूर्ति जक तयो तः  
गु धाई । थुगु ज्या खय् भैल नायोपुं हनय् च्वडः ज्या सानि ।  
भैलखतय् च्वडः जात्रा याई । भैलद्यो नपां भूजिं नं वैगु खाँ धः  
सा तःनुयो भूजिं वैगु मौशमया सन्देशकाथं कायफः । अलय  
न्हयाथायं भूजिं नं भुडः लकस हे म्हाय पुसे च्वनिगुलि ताल्ला  
कयंगुया सन्देश ब्यू ।

**भद्रकाली : (नकिंजु अजिमा)**

नेता जःगु चिच्या हांगु खतय् नकिंजु अजिमा (भद्रकाली)  
क्वहँ बिज्याकी । भैलखतय् थे थुकि नं अँसी दःसां अँसिखय द्यो  
धःसा दैमखु । खःयादथवी नकिंजु अजिमा बिज्याकी । ल्योसिं  
थानकीं भैलख व नकिंजु खचा नं ल्योसिं खयलय तय है । भैलखः  
जक तःमाही तयो द्यो क्वहँ बिज्याई खुन्हँ थःनय व क्वनय्या  
जनतां थः दखय् यंकयता लुई । घमा प्यचा दःगु थुगु खः थें  
ख्वपया मेमेगु खतय् धःसा घःमा दै मखु । उकिं ख्वपय् जुइगु  
जात्रा मध्येया भैलखः व नकिंजु खचाय् प्यचा-प्यचा घःमा दःगु  
थुकिया मेगु विशेषता खः ।

द्यो क्वहँ बिज्याइखुनुं थःनय यंकसा क्वनय् यंकसां खः  
थातय् लाकिगु धःसा गः हिति खः । आना नं हे खलॉ जुयो

## सच्छिव इयडागुगु स्वप पौ. ब.छि पौ(पाक्षिक)

ल्योसिं ख्यलय यंकिगु खः । भैलख लुइबलय हपः बिइम्हा सिं  
 अँसि च्वडः हःसय् धाइबलय लुइपुं फुक्क सिनं हाईसे धाई ।  
 अलय खः न्ह्यातकिं हा... धाधां लुयो यंकी । थुकिता लुयता तैगु  
 वल्लं, चिइगु पु अलय तैगु चुकु नपां सहेँया खाँ थाना न्हि थानय्गु  
 उपयुक्त ताय्का । श्वनं छगू स्वनिगः भ्वखाचा ब्वइगु थासय्  
 गथे भ्वखाचां अपलं स्यंकय् मफय्कः निर्माण याय् मः धाय्गुया  
 नमूना जक मखुला ? उकिं नेवः पहलं दाडः तःगु छँ थां, निल,  
 धलिया पहः गथे धाय्गु या नमूना भैलेखः दयकगुया पहः स्वय्ता  
 फुक्कसिनं खां कः तःमाहीया हःनय् तयो लच्छिबिकः दयकिगु  
 खःला ? अलय घमाः या सिं, त्वाकया सिं नपां मेगु छु सिं  
 छ्यलय् फै धाय्गुया छगू नमूना मखु धाय् मछिं । उकिं थुगु खः  
 त काष्ठकलाया बेजोड नमूना नपां उब्बेया निर्माणया स्यनय् ज्या  
 या कक्षाकाथं नं कायमालिला । मखुसा देगः देगलय् वहे काथंया  
 सिंया छ्यला छायतला ज्वी ?

न्ह्याथय् थजुयो ब्य नखा- चखा छगू थःगु पहः पिज्वइगु  
 संस्कृतिया ख्वःपा खः । नखाचखा दुनय् नय-त्वनय् नपां लसताया  
 प्याखं ख्वायँ कायो म्हाइपु-म्हिइपु तांकः छगु बांलाक तियो, छभ्व  
 साकः नय्गु अलय लसताय् थी थी पहः पिज्वय्किगु ई नं खः ।  
 नकतिनिया मतिनामि पिनिगु नपां वइगु अलय रसवसया खाँ  
 ल्हाय्गु छगु बांलागु ई नं जुयो बिई । अलय थुगु इलय् कः छँ  
 कय्गु ब्वजा नयमःगु नपां बिस्का जात्रा स्वः वानि बलय ग्वः नय  
 मःगु खाँ नं धायो तःगु खः । गगु चलन बुहाबुहीपुं नपां न्हँगु पुस्तां  
 नं याडः च्वंगु खानय् दः । अलय व हे इवलय् मेगु छपु म्यँ नं  
 पिज्वई :-

- हलिंपत फरफर सांक ल्योसिंथाडः हल रे,
- स्व वानय्नु
- आसे आसे जिमिकिजा मवनि,
- छोलि भः देह दः नि
- भैलखः स्वानय्याता,
- गँ लभं न्याय मालितिनि
- जिकय् धःसा ध्यवा मरुनि कायो ह्य मनिरे
- आसे दाइचा ॥

थुकाथं न्हँगु वर्षय् वैगु न्हँ जोडीया मतिनाया रसं जःगु  
 म्यँ स्वयोघातुया विरह म्यँ हे अपलं हाली ।

नेवः नखा दुनयँ बली प्रथा नं अः तक पाडः वगु दः  
 नि । अलय मँ, दुगु, भ्योँ स्यासां बेतः देकय् धःसा मिखुंचा  
 स्याइपुं नं अपलं दः नि । विशेष याडः बुँई बाली लगय् याइबलय्  
 गनां छ्वः हवलय् लुमांकः छ्वपु दंसा लाभा वा प्याज पिइबलय्  
 धवः दंसा तस्कं दसा मभिनिगु धायो तःगु जुल । अथे मजुइकेता

बेतद्योकय् मिखुंचा स्याडः क्षमा फ्वनिगु काथं नं कायो तःकाथं  
 धःसा बेतद्यो या पहः बिस्कं काथं स्वयो तःगु दः । अथे दंगु  
 खानकिं तुरुन्त बौ तय् यंकी । अलय चान्हय् वाडः आना खा  
 स्याडः सम्हय् नयो वैगु 'लाथाकिला' याइगु चलन नं दः । आना  
 भूत-प्रेत वयो ख्यो वैगुलि साहसया द्यो बेतद्योया साथ कःगु नं  
 धायो तःगु नं न्यनय् दः । तस्कं बल्लाम्हा काथं कायोतःम्हा  
 बेतद्यो वं डातापोल्हँया गःजु याकचां पाछायो च्वय तय यंकगु  
 अलय हतालं कयो जात्रा डायके मखां बलय् याकचां भैलखः लुयो  
 यंकगु धायो तःगु किम्बदन्ती नं बल्लाम्हा द्यो खः धाय्गु क्यं ।  
 श्वहे जात्रा लिपा ब्रम्हायणी-माहेश्वरी, छुम गणेद्यो, महाकाली-  
 महालक्ष्मी बाराही निसँ त्वालय त्वालय् अनेक जात्रा त न्ह्याकी ।

जात्राया इलय् च्वय ज्वलंखय् छ्यलिगु मध्ये न्यां (थ्वँ  
 ऐला) नं छगु जुल । अलय द्योयाता छायो थःपिसं नं त्वनिगु  
 चलन नं अः तक दः नि । अथेनं ख्वप दे या नां जःगु थ्वँ ऐलाया  
 पलिसा अः विदेशी ऐला, वियर छ्यलः हः सेलिं स्वदेशया धेवा  
 विदेशय् बः वाडः च्वंगु जक मखु मनूया जीवन नं वरवाद जुयो  
 च्वंगु दः । उकिया अर्थ थ्वँ ऐला त्वनय् हे मः धाय्गु मखुसँ  
 स्वदेशी वस्तुया सबः तांकः विदेशया सबः कायो जुयगु मज्यु धाय  
 ताडागु खः । धुम्रपान, मध्यपान स्वास्थ्यया लागिं मभिगु खाँ  
 थुइकः जक छ्यलय्गु बुद्धिमाती जुइ धाय्गु खः । अलय भैलखः  
 व नकिंजु अजिमाया खः ल्वाकिगु याता । समागमया अर्थय  
 कायो अशिललता काथं थुइकिपुं नं अपलं मरुगु मखु ।

न्ह्यागु थजु ख्वपया बिस्का जात्राया खाँ अजनं दुग्यंकः  
 हिलःमालः स्वय ल्यं दःनि थें ताय्का । इतिहासया लिधंसाय् नपां  
 संस्कार, संस्कृति अलय लोक जीवनय् डाल वयो च्वंगु गुलिं  
 न्यंकं बाखं, मिथक, किम्बदन्तीया खाँ दुनय् छु गजगु खसः च्वडः  
 च्वंगु दः उकियाता नं दुग्यंकः स्वयो विज्ञानया स्वपुकुनं स्वयफःसा  
 स्यडः च्वंगु बायँ सौ बां इलागु थें चोखः व पवित्र जक मखु  
 स्वस्थकर नं जुई । नपां नकतिनि बाँ इल सुचुकुचु याडः भ्वय्  
 ज्वलं ज्वरय् याय् हाँ या हसना थें जुई । समाजय् किम्बदन्ती अथे  
 बुयो वला खै मखु जुई । उकिया अर्थ ज्ञां अलय छुकिया प्रतीकं  
 जःगु लोक साहित्य काथं पिज्वला धाय्गु खाँ नं सिइके फःसा  
 लोकं ह्वागु बिस्का बलय् न्हँगु वर्ष नपां न्हँगु ज्ञानया ल्योसिं दानि  
 मनय् लसताया भैलखः लुयो है ।

जगज्योति मल्लं ने.सं. ६९० सं दयकगु बिस्का जात्रा  
 छगू धिं धिं बल्ला, छगू छप्पा छधिया चिं अलय संस्कार संस्कृतिया  
 छगू माया मतिना नपां घयपुडः तःगु खां प्रतिक, ख्वपया बिस्कंगु  
 जात्रा, बिस्का जात्रा, भ्नीगु गौरव भ्नीगु म्हासिका ल्यंकः म्वाकः  
 तय ।



## चीकुलाया ण्हि- ई व बःहांचा

पूर्ण वैद्य

शहरछि चकक

चीकुला वयाः

ण्हि पानातःगु दु

मनूत उकी च्वनाः

थःथःगु ई प्वलाः नयाच्वन

मानौ, बःहांचा खः ई

यात्रा जीन्दगीया ।

गुलसितिं खाइक्क व्वः व

गुलसितिं ध्वरगी, फाकु

गुलसितिं धाःसा भुरुम् भुरुम् माकु

पानातःगु छपाः हे ण्हिया सहभागीताय्

छगू हे शहरया मनूतय्

ई प्वला ननं ख्वास्या, मूड पा

इमि लय् व तया डिग्री पा

ईया सवाः या खँ न्हयथनकि हे

लवापु दनीगु हे उकिं

थुकियात हिलेमाः म्वाःया खँय्

सकसिनं न्ह्याइपुक ण्हि छ्याये धकाः हे ला

सुथं निसें मनूत थःथःगु हिचः तिं

ण्हिच्छ्यात गाक्क प्वः प्वः ई कयाः हयाच्वन

ण्हि पायेहःगु निभाःया हासाचां ।

जिन्दगी हे ईया प्वः छप्वः मखां ?

छुं भतिचा निभाः व किचःया

छुं भतिचा फय् व खसुया

छुं भतिचा दँ बर्दया प्वः श्व !

तर, छगू हे थासय् नं मनूतय् ब्वलय्

छगू हे ई थपाय्चव बू-मबू, साः- मसाः गय् जुल ?

सुनां गज्याःगु संस्कारय् सियाहःगु श्व ई ?

गुलिसिनं धाइ -

म्हिंगः या पुसा हे उन्नत मजू

ई पियेगु थनया चा व लः फय् हे मिलय् मजू

व ब्वलनीगु संस्कार हे स्यं आदि इत्यादि ... ..

तर चुपचाप ... ..

ण्हिथं श्व शहरय, सुथया लुखा चायेकथं

ण्हि पायेहइ - दुकाइ

दुकाइ - पाये हइ

लाःसा वयागु ई किलं नइ धकाः जुइ !

ईया श्व हाट बजारय्

मनूत तये मखनि भासं

ल्हाःतय् लाः वक्क ई नापं

ण्हिथं जीवन बुलाकाइ

वाःगु चिकनय् इताः बुले थें

गुलिं थिइक च्याइ अन

गुलिं तिरितिरिं मिनिइ

गुलिं ला कुँ जक फइ

आयुया इताः त

ईया पुसात

तर, ई चुपचाप ... ..

प्रत्येक जीवनं तिकि ननाच्वन

प्रत्येक बस्तीं बाः वनाच्वन

चुपचाप ... .. चुपचाप

खला, विरोध दु चुपचाप दुने नं तन्न तन्न ... ..

अथे नं तज्याये मफुतलेया

छगू मौन थुनाः न्ह्याइ युग दुने दुने

जिगु सुथ - बहण्हिया सिथ सिथं

जि नं - श्व हे इलं

ज्वयाः वयाच्वना

तप् ... तप्... श्व बँय् थन

छगू ई जिके नं ज्वयाः वनाच्वन

तिकि ... तिकि ... ननाः अन

गन श्व बँया भविष्य जायाः वयाच्वन ।

(खेलुइताः १३:१३:१११२)

## केहें पापी उवाराउवारा

मुंमहा प्रेमबहादुर कसा

छगू देशय निम्हा तकेहें दु । निम्हं तस्सक हे बांला । इपिं साप जा । न्ह्याथाय् वंसां निम्हा नापणं वनीगु । छंसां दंसां, वंसां, चवंसां निम्हा नापनापं हे जुइगु । छन्हु जुजुं इमित पय्न् लहाकेहल । निम्हं जूसा वये, छम्हा जक ला बाया वये मखु धागुलिं जुजुं निम्हेसितं ब्याहा याना न्हयथु लिथु याना तयातल ।

जुजुया न्हयथु लिथु निम्हं उतिकं हे य । इमिसं धाधाथे यानातल । इपिं नं जुजुं ययेकेत न्हिछि न्हिछि कोथाय् चवना समा जक यानाचवनीगु । छन्हु तकेहें निम्हं सदां थें कोथाय् चवना समा याना न्हाय्कं स्वयाचवन । केहें म्हेस्या भति मतिइ पाप वल । छु यात घासा जुजुं ततायात सिकं थत अप्पो ययेके फइ धका बिचा यात । न्हायकं स्वया बिचा यायां वं छगु जुगति लुइका तताम्हेसित धाल - “यता, यता ! न्हाय्कनय् भ्नीपिं गपायसकं बांला खनेदु

हला ? तुं थिइ गय खनेदइ थें छक स्ववनेनु रे ।’ केहें यागु खँ न्यना तताम्हा सोभारथं वनाप तुंथिइ वन । निम्हेस्यां कोछुना लखय् थपिनिगु खा स्वयाचवन । तताम्हेस्या अथे कोस्वया चवंबले केहें म्हेस्यां तीजक ल्यूने वना ध्वानाघिना वयात तुंथिइ कुर्कावछत । अले थ सरासर कोथाय् वया न्हापा गये अथे हे समा याना चवन जुजु दुहां वल । न्हापा लिपा जूसा जुजु वयेव तकेहें निम्हेस्यां स्वागत याइगु । थौं केहें म्हेस्यां जक यात । तताम्हा मखना छिमि तता गो ले धका जुजुं न्यन । ‘न्हाचंनिसें मरु, गन वन थें मस्यु’ धका केहें म्हेस्यां धाल । जुजुं मनु वछया उखे थुखे मायेके वछत । गनं हे मरु । जुजुया तस्सकं नुग मछिन । नये नं यगु मखु, त्वने नं यगु मखु । जुजु विरह याना कोथां हे पिहाँ मवसें चवंचवन । न्यान्हु खुन्हु दसेलिं छन्हु जुजु मंमरु मंमरु क्यबय् चाहयूवन । चाहूँ व

हे तुंयाथाय् थयंबले अन तस्सकं हे बांलागु पलेस्वां छफो व्हयाचवंगु खन । जुजुया लोवन । सिपाइ छम्हेसित वछया व पलेस्वां श्वके छत । सिपाइनं वना स्वां श्वये धका ल हा वछयेव व स्वां ला वं न्ह्याये मदयेक कवे कवहां वन । वं ल्हा लिकायेव हानं चवे थहां वल । वं हानं श्वयेत्यनेव कवहाँ वनीगु, ल्हा लिकायेव थहाँ वइगु । थथे जूगुलिं अदभुत चाया सिपाइनं वया जूगु खँ जुजुयात बिनित यात । स्वां छफो हे श्वयाहये मफुम्हा धका जुजु सिपाइयात छक हकल । ‘स्वे बि, जिं हे श्वयाहये’ धयाधिया जुजु तुंथिइ वंबले स्वां ला न्हयोने थयंक वल । जुजुं स्वां श्वयाकाल ।

जुजुया व स्वां तस्सकं यल । वंथाय् तक ज्वना जुल । लिपा कोथाय हया फुंगाय् तयातल । गोन्हु दया नं सुकू मगं । महारानीयात सिकं व स्वांयात जुजुं अप्पो माया यानातल । श्व खना



महारानीया नुग मुल । छन्हू जुजु पिहाँ वँतलें महारानी व स्वां काचाकुचु याना पलिइ वांछवयाबिल । जुजु दुहाँ वया कोथाय् वना स्ववंबले स्वाँ छत्ति मरु । थन च्वंगु स्वां गो धका महारानीयाके न्यन । ख, सुकू गनांवंगुलिं पलिइ वांछैबिया धका महारानीं लिस बिल । 'न्हाच तक छुं मज्जू स्वां, अपायसकं याकन सुकू गन का मखुला, गोगन वांछया' धका पलिइ वना स्ववन । अन स्वां मरु । तुंथिइ हानं अज्यागु हे मेगु स्वां व्ह्याच्वंगु दुला धका स्ववन । मरु । अनसं पखामोलय च्वना बांला बखुं छम्हा हालाच्वंगु खन । बखुं खनेव जुजुया स्वां ला लोहेमन । बखुं लायेमास्ते वया सिपाइयात धाल- "स्व, व बखुं गपायसकं बांला ! लानाहति हँ !" लाये धका सिपाइ वनेव बखुं ढवयावन । सिपाइ लिहाँ वयेव हानं अन हे जूवल । हानं सिपाइ वन, हानं बखुं उखेथुखे ढवयावन । सिपाइ वैत लाये हे मफुसेलि जुजु थ हे बखुं लायेत न्हयचिल । जुजुं लावंबले बखुं बिसिमवं । बरु भुरं ढवया जुजुयागु न्हातय् जूवल ।

बखुं ज्वना जुजु लायकुलिइ वल । वया व बखुं साप यल । वंथाय् तक बखुं ज्वनाजुल । नसा नं थम्हं हे नकीगु । बखुंग नं थगु हे कोथाय् दयेकाबिल । जुजुं बखुंयात अपाय सकं माया यागु खना महारानीया कुनुकुनु तं पिहाँ वल । जुजु पिहाँ वन कि स्याना ला दायेका नये धका वं तातुनाचवन । तर, बखुं खना मोह जूम्हा जुजु पिहाँ हे वंगु मखु । महारानी धासा गबले जुजु पिहाँ वनी धका तस्सकं आय्बुया चवन । छन्हू मज्जिमगागु ज्याय् जुजु पिहाँ वनेमाल । व हे होता स्वया महारानीं बखुंयात स्यानासिना वयागु ला दायेकल । जुजुया अपायसकं यम्हेसिगु ला जुजुयात हे नकेगु धका वं मनंमनं कोछित । ला

दासिवल । व ला दाबले 'केहें पापी ग्वाराग्वारा, केहें पापी ग्वाराग्वारा' धका दाल । अबले हे जुजु दुहाँ वल । कोथाय् बना बखुं स्ववन । बखुं मदु । न्यंकभनं स्वत । गनं हे मरु । अले महारानीयाके बखुं गो धका न्यन । 'मस्यु गन वन थें, भतिं यन जुइ का' धका महारानीं लिस बिल । महारानीया लिस न्यना जुजुया तस्सकं नुग मछिन । ननिहेमवासे सुम्क च्वंचवंबले ला दागु स ताल । व छु स वगु धका महारानीयाके न्यन । 'ख, थौं छम्हेस्यां गुँखा छम्हा बीहगु, वयागु हे ला दायेका च्वनागु स वगु का' धाल । जुजुं क्वथीक न्यना हानं धाल- "मखु, थवं छुं धैच्वंथें च्वं । छु मस्या ग्वारा- ग्वारा धका हालाच्वंथें च्वं ।" महारानीया छु धाये, छु धाये जुल । 'छुं हालाच्वंगु मखु, ग्वाराग्वारा दायच्वंगु का' धाल । तर, जुजुयात सखा वन । अवश्यनं थव ला नयां भिं जुइमखु धका भापा महारानीयात धाल । "आम लां ला छुं धैच्वंगु अवश्य दु । अथे धायेसगु ला नयेमजिउ । अकिं आम थलं नापं सागालय् वांछैब्यु ।" जुजुं मनयेकं थम्हं नं नये-मजिया जुजुं धाथें महारानीं फुक्क ला सागलय् वांछैबिल ।

थुखे बखुं नाप बायेमाला जुजुया मन थातय् मला । उखे बखुंया ला जुजुयात नके मखना महारानीया खवा चमकं । थव हे रीतं च्यान्हू, भिन्हू, बाछि फुत । छन्हू जुजुं सागालय् सन्त्रासिमा छमा बुयावैच्वंगु खन । व मा न्ह्यान्हिथं तमा जुयावल । स्वस्वं हे भराय्मा जुया वुं व्हल, सि नं सल । छग तगोगु सन्त्रासि ह्याउँ से पकलपा कचाय् यातायातां क्वछुना चवन । जुजुया व सन्त्रासि खाना नयेमास्ते वल । छम्हा च्योयात सता सन्त्रास खाके छ्वत । च्योनं खायेत स्वबले व सन्त्रासि वं न्ह्याये

मदयेक उखेर थयंक वन । क्वं खायेत स्वसा च्वे वनीगु, च्वं खायेत स्वसा क्वे वनीगु 'न्ह्याब्ले' अथे जुइगु ! पलेस्वां नं सुनानं थवये मफु । जि वनातिनि थवया । बखुं नं सुनानं लायेमफु । जिं हे लाना । आ थव सन्त्रासि नं इमिसं खायेमफु । गय् थव ! जिं हे जक खाये फइगु ला ! स्वे सा' धयाधिया जुजु थ हे वन । धाथें जुजु वने वं सन्त्रासि क्वथयंक वया जुजुया न्ह्योनेसं च्वँवल । जुजुं सुम्क खानाहल ।

कोथाय् बना जुजुं सन्त्रासि प्वलेत्यंबले 'तीजक प्व, तीजक प्व' धका सन्त्रासि हालाहल । 'लां छु मस्या ग्वाराग्वारा धाल, आ थव सन्त्रासि तीजक प्व धाल । छु धैगु जूगु थव !' धकः जुजु गजब जुल । अयनं सन्त्रास धाथें तीजक प्वला स्वबले सन्त्रासिया दुने तधीम्हा महारानी छम्हं । 'अहो अदभुत ! सन्त्रासिया दुने छ गय् लात ?' धका जुजु न्यसेलि जुको खँ छसिकथं कनाहल - "तुं थिइ क्वस्वया च्वनावले केहें म्हेस्यां धवाना कुर्केछगु । पलेश्वां जुया जन्म कैगु । केहें म्हेस्यां पलेस्वां काचाकुचु याना वांछैबिउगु । अनलि बखुं जुया जन्म कैगु । बखुंयात स्याना ला दायेका जुजुयात नके धका केहें म्हेस्यां तातुंगु । केहें पापी ग्वाराग्वारा धका हालागु जुजुं थुइके मफुगु । अले जुजु संखा याना ला फुक्क सागलय् वांछ-कूगु । अनलि सन्त्रासिमा जुया जन्म कयागु थथे छगु छगु दत्तले खँ जुजुयात कनेधुंका वं धाल - "न्ह्यागु जन्म कासां नं केहें नं जित मही । जित स्यंकेत हे जक स्वइगु । अकि आ हानं मनु जन्म कया वयागु ख ।"

तधीम्हा महारानीयागु खँ न्यना जुजु चीधीम्हा महारानी खना तस्सकं तंम्बयेकल । अले वैत न्हाय् व सप ध्यना पितिना वछत उलिचा बाखं थुलि ।

## पाहांचःद्वे

मुंठहा : कमला मानन्धर, रै



महाद्यःयात हे थीगु कुतः  
यात । दैत्यं थःगु छ्यनय्  
थ्यूवःगु खनाः महाद्यः ग्यानाः  
विस्सु वन । तर बिस्सुं वंसां  
दैत्य लीगु धाःसा मत्वःतू ।  
उकि दैत्य खनी धकाः महाद्यः  
चाया तःलय् फोहोर थासय्  
लुकुंव्यू वन । महाद्यः अथे  
लुकुं व्यूवंगु जुयाः श्व  
महाद्यःयात लुकुमाद्यः धाःगु  
जुयाचवन ।

पाहांचःःहेवल्य् थीथी  
थासय् च्वपि अजिमापिनिगु  
जात्रा जुइ । गथेकि लुंमधि  
अजिमा, कंग अजिमा, म्ह्यपि  
अजिमा, तखित अजिमा,

पाहांचःःहे नखः चैत्रकृष्ण  
चतुर्दशीकुन्हु लाः वः । पाहांचःःहे सुरु जुइ  
न्ह्यः दकले न्हापां लुकुमाःद्यःया पुजा याइ ।  
लुकुमाःद्यः धकाः चाया तःले वा फोहोर  
थासय् सुलाचवंम्ह महाद्यः खः । उकिं  
पाहांचःःहेवल्य् लुकुमाः द्यः पुजा याये न्ह्यः  
दकले न्हापां गा म्हयाः चाया तःले च्वंम्ह  
द्यः खने दयेकेगु याइ । द्यः खने दयेकेधुंकाः  
गाः नापं बँ इला सफा याइ ।

पुजा याइबलय् लुँबुं (म्हासुगु  
तिकस्वां), वहःबुँ (तुयुगु लैस्वा) तयाः ला,  
वः, अय्लाः, श्वं, वाउंगु लाभामा छाइ ।  
पाहांचःःहेयात लाभा नखः न धायेगु याः ।  
पाहांचःःहेवल्य् द्यःयात लाभामा मछासे  
मगाः । लाभा नल कि भूतप्रेतं थी फइ  
मखु धाइ ।

पुजा सिधल कि द्यःयाथाय् फया  
तःगु अजः कया हइ । फया का गु अजल  
सकसित मिखाय् उला बी । थथे मिखाय्  
अजः उल धाःसा मिखा तेल्लाइ, मस्तयत्  
भूतप्रेत, पिशाच थी मखु धाइ । वास्तवय्  
महाद्यः धयाम्हे श्वं, अय्लाः, ला नइम्ह

मखु अयनं पाहांचःःहेकुन्हु छन्हु नइ ।  
छाय्धाःसां श्व दिनय् महाद्यःया कलाः  
पार्वती अय्लाः, श्वं, ला नयेमाः धकाः  
कर याःगु जुयाचवन । नये न्ह्यः पिशाचया  
रूप कयाः लुंबु व वह बुं नःगु खः । उकिं  
पाहांचःःहेयात 'पिशाच चतुर्दशी' न धाइ ।  
पाहांचःःहेवल्य् महाद्यः छाय्  
लुकुबिना च्वने माल धइगु बारे थीथी वाखं  
दु । थुकी मध्ये लोकंहवाःगु छपु बाखं थथे  
दुः ।

छक्वः छम्ह दैत्य महाद्यःया नां  
कयाः तपस्या च्वंगु जुयाचवन । श्व खं  
सीकाः महाद्यः दैत्ययाथाय् वन । महाद्यः  
तसकं लय्तायाः दैत्ययात 'छु वरदान फवने  
यः फवं' धाल । दैत्यं नं 'जिं न्ह्याम्हेसिया  
छ्यनय् थ्यूसां व मनू भष्म जुइमा' धका  
वरदान फवन । महाद्यव नं दैत्यं धा थें  
वरदान बिल । थथे भष्म जुइगु वरदान  
का म्ह जूगुलि उम्ह दैत्यया नां हे 'भष्मासुर  
दैत्य' जूवन । वरदान कायेधुंकाः दैत्यं  
महाद्यवं ब्यूगु वरदान लगे जुइ लाकि मजुइ  
छक्वः स्वये माल धकाः दकले न्हापा

बछला अजिमा आदिपिनिगु जात्रा न्यायेकी ।  
लुतिमरु अजिमा छम्हेसिया जात्रा धाःसा  
लिपा जक जुइ । लुतिमरुया जात्रा छाय्  
लिपा जुल धयागु बारे छपु बाखं न दुः

पाहांचःःहेकुन्हु च्याम्ह तःकेहें मध्ये  
दकले तःधीम्हेस्यां सकले अजिमापित  
पाहांचःःहेया नखत्या सःतूगु जुयाचवन ।  
नखत्या सःतूगुलिं तःकेहेपि सकले मचाखाचा  
नापं ज्वनाः नखत्या वनी । दकले चीथीम्ह  
केहें लुतिमदु अजिमा छम्ह धाःसा तसकं  
गरिबम्ह व मचाखाचा नं यक्व दुम्ह  
जुयाचवन । उकिं नखत्या भ्वजय् मेमेपि  
त केहेपित नकाः लुतिमरु अजिमा व वया  
मस्तयत् धाःसा भ्वय् मनकुसे ताउत तक  
पीका तल । थथे पीका तःगुलि सह याये  
मफयाः लुतिमरु अजिमा मस्त ज्वनाः छेय्  
लिहा वनी ।

छेय् लिहा वनाच्वंगु इलय् लँय्  
फसि छगः वाना तःगु खन । मस्तयत् वह  
फसि दयेकाः नके धकाः लुतिमरु अजिमां  
फसि ज्वनाः छँय् वन । छँय् थ्यकाः फसि  
ताये धकाः स्वःबलय् फसि ला लुँ धकाः



जुयाचवन । श्व लुँ दया: लुतिमरु अजिमा नं त:मि जुल । मेगु दँया पाहांच:ऱेबलय् तताया छँय् हानं नखत्या जुल । नखत्या वंबलय् लुतिमरु अजिमा थ: व थ: मस्तयत्त ज्वाँय्ज्वाँय् तिसां तीका: यकल । लुतिमरु अजिमा त:मि जूगुलिं वयात साक्क भिंक माने याना: नकेगु यात । तर लुतिमरु अजिमा थम्हं मनसे थ:गु लुँया तिसायात भ्वय् ब्वय् ल्वसुका: 'का न, बालाक न' धका: थीकाचवन । श्व छु यानागु धका: ततापिसं न्यंबलय् लुतिमरु अजिमा धाल, 'छिमिसं जित: माने या:गु मखु श्व लुँयागु तिसायात माने या:गु ख: । उकि भ्वय् नं श्वहे लुँयागु तिसायात नकागु का ।'

वयागु खं न्यना: सकले जिल्ल जुल । लुतिमरु अजिमा आवलि जि छिमिथाय् नखत्या वये नं मखु, नये नं मखु धका: लिहा वन । उकि लुतिमरु अजिमाया जात्रा पाहांच:ऱे कुन्हु मयासे व सिबे न प्यला न्ह्य: बालाच ऱे कुन्हु

यानात:गु ख: धाइ ।

पाहांच:ऱेया निन्हु कुन्हु थीथी त्वाल्य् मर:जा नकेगु याइ । मर:जा कयतापुजा मया: निपि मिजं मस्त व इहि मया निपि मिसामस्तयत्त नकी । मर:जा नकल कि मस्त अरिं चाइ मखु, ल्वचं कइ मखु धाइ । वकुन्हु हे निहन्य् तिख्यलय् सल ढ्वाकेगु जात्रा जुइ । श्वयात 'घोडेजात्रा' धाई । तिख्यलय् सल ढ्वाकेगु जात्रा यानात:गु बारे न छपु बाख दु:

न्हापा न्हापा यँय् गुरुमापा धइम्ह छम्ह राक्षस दुगु जुयाचवन । व राक्षस मस्त जक नया: हैरान यानाचवंगु जुयाचवन । उकि छन्हु त्वाल्य् च्वपिं मनूत मुना: सहलह यासे आ उम्ह राक्षसयात स्यायेगु धका: निर्णय यात । उकि उमिसं गुरुमापा राक्षसयात स्यायेत द्रग: गा: नं म्हुया तल । छन्हु व राक्षस वहे गाल्य् कुतं वन । अले वयात

म्वा:म्वाकं अन हे थुना बिल । तर थुना व्यूसा राक्षस धा:सा मसीनिगु जुयाचवन । उकि व हाकनं बदला का: वइ धका: वयात सलं न्हुया: स्याना छ्वत । अय् जुया: उम्ह राक्षस हानं दना वइ धका: दयदसं हे सल ढ्वाका: वयात दबे याना तइगु जुयाचवन । वहे सल ढ्वाकेगु ज्यायात 'घोडेजात्रा' धा:गु ख: ।

पाहांच:ऱेबलय् तिख्य: दुने छक: व असनय् छक: याना: निक: छ: ल्वाकेगु जात्रा जुइ । थुकी बटुइ च्वम्ह लुंमधि अजिमा व तेवहालय् च्वम्ह लुंमधि अजिमाया खत कंग अजिमाया ख:यात चा:हिला: तिप्वा: हिलेगु याइ । थुकियात त:केहें थवथ: नापला:गु धाइ । असनय् छ: ल्वाके सिधल कि स्वन्हुयंकं हनीगु पाहांच: हे नख: क्वचाइ ।

पाहाच ऱे नख:बलय् पासापित नं नखत्या स:तेगु याइ । उकि श्व नख: यात 'पासाच:ऱे' नं धा: ।

## खवप नगरपालिकाया ज्या भवः त

### सिजः फल्चा निःस्वान

चैत्र १४ गते



खवप नगरपालिकाया प्रमुख सुनिल प्रजापति जुं खवप नगरपालिका वडा नं १० सुकुना फाँटया सिजः फल्चा निःस्वाडः दिसे खवपया थाय्यापुलांगु नांत ल्यंकः तयःगु भीगु कर्तव्य खः धायोदिसे थानाया म्हासिइका ल्यंकः म्वाकः तयता थानाया धार्मिक, सांस्कृतिक व ऐतिहासिक महत्व कः घाडः च्वंगु त्वः, बस्ती, मथ देगः, सतः, फल्चा थजगु थी थी नांत ल्यंक मतसें मगागु खाँ काडः दिल ।

नगरया छगू छगू फल्चा थिइक नाः छँ दैगु खाँ न्हिथांसे वयकलं सम्पदा ल्यंकः म्वाकः भिंकः तयगु ज्याखय् खवप नगरपालिकां हदाय च्वडः नगर दुनय्या फल्चा ल्हनयगु ज्या हछ्याड च्वंगु खाँ व्याकसे सम्पदा ल्यंकः म्वाकः तयगु ज्या सामाजिक सम्पति काथं कायो ल्हवडः, दाडः, खवप नगरपालिकां याडः वगु नपां मूर्त अमूर्त सम्पदां याडः खवप दे थौं हलिमयया च्वजःगु छक मवसें मगागु गन्तव्य स्थल काथं हज्याडः च्वंगु खाँ काडः दिल ।

### सहकारी अनुगमन

चैत्र १३ गते

खवप नगरपालिका सहकारी अनुगमन समितिपाखं बुधवार खवप नगरपालिका वडा नं १ या बचत तथा ऋण सहकारी संस्था लि. सं अनुगमनया इवल्य उगु सहकारी आ.व. २०७९/८० निसें लेखा परीक्षण मयाकगु, वार्षिक साधारणसभा नं मयागु, दाच्छि हाँ निसें सञ्चालक समितिया बैठक नं मच्वंगु अलय सहकारीया न्हापा यायपुं कर्मचारी व पदाधिकारीपुं थःगु दायित्व मयागु खाँ सहकारी अनुगमन समितिया कजि हरिप्रसाद बासुकलां धायो दिल । धितो मकसिं ऋण ब्यगुलिं ऋण लिताकाय् मफःगुलिं

भीगु थासय् विकास भीसं हे यायगु खः कतयाडः बिइ धायगु मतिं कतया भरय च्वनयगु मति त्वः त वयकलं फल्चा भिंकः बल्लाकः इलय् हे दानयता इनाप नं याडः दिल ।

खवप नगरपालिका वडा नं. १० या वडाध्यक्ष लक्ष्मी प्रसाद हयोमिखां वडा नं १० य ५४ गू फल्चात दःगु सिजः फल्चा ल्हवडः दानय् धुंक छालिङ्ग या जनता व थानाया किसानतयता भिं जुइगु खाँ नपां पुखु संरक्षण याडः वयागु नपां थव फल्चा इलय् हे दानय् धुंकयता उपभोक्ता समितिता इनाप याडः दिल ।

पूर्व वडाध्यक्ष चन्द्र बहादुर उलकं खवप नगरपालिकां फुक्क सम्पदात हदाय तयो ल्यंकः म्वाकः वयो च्वंगु च्वछाय् बहजु धायो दिल ।

समाजसेवी न्हुच्छेभक्त फौजुं नगरपालिकाया ज्या इवः या आमदानी व खर्च पारदर्शीढंगं पिब्वय मःगु सुकुना फाँटय् न्हँगु बस्ती च्वँ वयगु याडः हगुलिं थानाया ऐतिहासिक व पुलांगु नां काथं हे छयलय् मः धायोदिल ।

सम्पदा शाखा प्रमुख ई. राम गोविन्द श्रेष्ठं फल्चाया ऐतिहासिक खाँत काडः दिसे फल्चा दयकेता स्थानीय जनतापाखं आर्थिक ग्वाहाली व श्रमदान दैगु आशा नं याडः दिल । फल्चा दानय धुंक थुगु फल्चा ल्यंकः भिंकः तयगुलि स्थानीय मनूतयगु तहांग लाहा दय्मः धायोदिल ।

ज्या इवः सं फल्चा पुनः निर्माण उपभोक्ता समितिया नायो ज्ञान कुमार मगजु, खवप नगरपालिका वडा नं १० या वडाया दुजः जितेन्द्र मुनकःमि व कृष्ण नारायण दुमरं नं न्वचु तयो द्यगु खः ।

बचत नं लिता बिय मफःगु अनुगमनया इवल्य खानय् दत ।

सञ्चालक समितिया बैठक च्वडः लेखा परीक्षण स्वीकृतिका लागि नगरपालिकाय् स्वीकृति कायमःगु, साधारण सभा क्वः छिय मःगु, ऋणकपिन्ता पुइकः बचत लिता बिय मःगु सुभावा सञ्चालक समितिता ब्यगु जुल ।

अनुगमनया दुजः पुं श्याम सुन्दर मातां, हरिरत्न गोर्खाली, कृष्णगोपाल चौगुठी, तारादेवी शाक्य, सहकारी शाखा प्रमुख रेबिड कुस्मा नं भःगु जुल ।

## लोकं ह्वागु बिस्का जात्रा तःजिक हानय्ता बैठक

चैत्र १४ गते

व अःतक जुयो च्वंगु ज्याया खौ काडः दिल ।



खवप नगरपालिकाया प्रमुख सुनिल प्रजापतिया नायोसुई खवपया लोकं ह्वागु बिस्का जात्रा तःजिक शान्तिपूर्ण काथं हानय्ता स्वापु दःपुं नपां च्वडः खवप नगरपालिकाया सभा कक्ष च्वंगु जुल । उगु बैठकय् प्रमुख प्रजापति जुं २०८१/८२ या बिस्का जात्रा इलय हे तः जिक क्वचाय्केता स्वापु दःपुं सकलसिनं थःथःगु थासं मःकाथं ज्या याडः दियता इनाप याडः दिल । वयकलं २०८१ चैत्र २८ गते निसं २०८२ वैशाख ५ गते तक च्याचा गुन्हु जुइगु बिस्का जात्रा देशी विदेशीतय्गु नं मंकः जात्रा जुयधुंगु खौ काडः दिल । अथेहे उप प्रमुख रजनी जोशी जुं वांगु दायं थं तस्कं बांलाक, बिस्का जात्रा क्वचाय्केता सकलसिनं ग्वाहाली याडः दीगु विश्वास प्वंक दिल ।

जिल्ला प्रशासन कार्यालय भक्तपुरया प्र.जि.अ. गोपाल प्रसाद अर्यालं खवप नगरपालिकां थःगु धायगु भावनां ग्वाकः बिस्का जात्रा शान्तिपूर्ण ढंगं डाय्केगु कुतः याडः च्वंगु च्वछाय् बहजु धायो दिसे देया गौरब काथं डाय्कः वयो च्वंगु बिस्का जात्राता तःजिक हानय्ता सकलसिया ग्वाहाली मदय्क मगा धायो दिल ।

गुठी संस्थान भक्तपुरया प्रमुख खिमा ओली जुं गुठी संस्थान कार्यालयं अः तक बिस्का जात्राया तयारीया खौ काडः दिल ।

बैठकसं खवप नगरपालिकाया जनप्रतिनिधि, राष्ट्रिय अनुसन्धान विभाग, सशस्त्र प्रहरी बल, नेपाल टेलिकम, काठमाण्डौ उपत्यका खानेपानी लिमिटेड, नेपाल विद्युत प्राधिकरण, नेपाल सोसाइटी रेड्क्रस सोसाइटी, भैरव नाथजात्रा सहयोग समिति, अस्पतालया प्रतिनिधिपुं व जात्रा नपां स्वापु दःपुं भःगु खः सा बिस्का जात्रा व्यवस्थापन याय्गु खायं थःथःगु थासं याय्गु ग्वाहाली

उगु बैठकं क्वय् च्वया काथंया निपं (निर्णय) नं यागु जुल ।

- थुगुसीया बिस्का जात्रा शान्तिपूर्ण व तःजिक हानय्ता जात्रा न्ह्याकिगु फुक्क थासय सुचुकुचु व मःकाथंया व्यवस्थापन व प्रचार प्रसार नपां स्वापु दःपुं नपां मंकःज्या खवप नगरपालिकां याय्गु खौ क्वःजित ।
  - बिस्का जात्रा ज्वःछि नगरया शान्ति सुरक्षाय व्यवस्था जिल्ला प्रशासन कार्यालय भक्तपुर व जिल्ला प्रहरी परिसर भक्तपुर नपां सुरक्षा निकायं मिलय याडः बांलाकः याय्गु ।
  - बिस्का जात्राया फुक्क पूजा-आजा व मः काथंया तयारी भैल नायोपुं, भद्रकाली अजिमाया गुथियारपुं, जात्रा व्यवस्थापन समिति व स्वापु दःगु वडा कार्यालयता जिम्मा बियगु ।
  - बिस्का जात्राया फुक्क पुजा-आजात इलय हे जुडः क्वचाय्केता मःकाथं तयारीयाय्ता गुठी संस्थान शाखा कार्यालय भक्तपुर ता जिम्मा बियगु ।
  - बिस्का जात्रा न्ह्याइगु थासयया फुक्क तार, केबुल व फाइबरनेट या तारत थासय लाकय्गु स्वापु दःगु सेवा प्रदायक पिन्ता जिम्मा बियगु व मः काथं ग्वाहाली नगरपालिकां याय्गु ।
  - बिस्का जात्रा जुयो च्वनिगु दिनय नगर क्षेत्र दुनयया अस्पतालया एम्बुलेन्स, दमकल व विपदपूर्वतयारीया सामानत तयारी अवस्थाय तयोतय्ता नेपाल रेड्क्रस सोसाइटी, भक्तपुरं मःगु व्यवस्थापन याय्गु, अलय अस्पतालं इमर्जन्सी वार्डय स्वास्थ्यकःमिपिन्ता सतर्क अवस्थाय तय्ता नगरपालिकां मः काथंया व्यवस्था याय्गु ।
  - बिस्का जात्राया इलय अपलं हुल जुइगु दिनसं २०८१ चैत्र ३१, २०८२ वैशाख १ व ५ गते हुल जुइगु थासय ग्वाहालीमिपुं छ्वयो ग्वाहाली याय्गु ।
  - बिस्का जात्राबलय लायं सवारी साधन ब्यवस्थित याय्ता ट्राफिक कार्यालय भक्तपुरता जिम्मा बियगु ।
  - त्वनय्गु नाः या ब्यवस्थापन के.यु.के.एल ता व बिजुली मता च्याकय्गुलि समस्या मवयक व्यवस्था याय्ता नेपाल विद्युत प्राधिकरण भक्तपुर शाखाता जिम्मा बियगु ।
- अथेहे चैत्र २६ गते स्वापु दःपुं नपां बिस्का जात्राया बैठक च्वडः तःजिक हानयता निर्णय यागु जुल ।

# इन्जिनियरपुं निःस्वार्थ जुयो दे विकासय् हज्याय् मः

चैत्र १६ गते



इन्जिनियर समाज नेपालया केन्द्रीय कार्य समिति न्हँधा जूगु ज्या सना पुचः सं न्हँगु ज्यासना पुचः नपां न्हयम्हासिया सल्लाहकार समिति अलय प्रदेशय् नं समाजमा संगठन छ्यडः यंकय्ता प्रदेश समन्वयया जिम्मा नं क्वःछित ।

उगु ज्या इवः सं नेपाल मजदुर किसान पार्टीया छ्याञ्जे नपां संघीय सांसद प्रेम सुवाल इन्जिनियरिड सेवाखय् जुपुं विकास निर्माणय् निःस्वार्थ जुयो ज्या सानय मः धायो दिसे नकतिनिजक म्यान्मार थाइल्याण्डय् ब्वःगु तः भ्वखाचां गुलि स्यंकला ? अथे स्यंकयगुलि संरचना दयकिपुं गुलिसिया छु गुलि जिम्मेवार दः धायगु थजगु अनुसन्धानमूलक (हिलः मालः स्वयो) च्वसुत च्वयो नेपःमि पिन्ता ग्वाकय फःसा बांलाई धायोदिल ।

डण्डी व सिमन्टीया भः थिकय जुसेलिं सर्वसाधारण जनताता मार परय् जूगु खाँ कुल दिसे सांसद सुवाल 'बजार भः थिकय याय् मःगु छाय् धायगु खाँ धात्थेंगु खाँ कुल स्वय मःगु उद्योगमन्त्री भः थाकाय्मःगु खः धःगु लि अपुं मिलय जुयो यागु हे जुयमः धायो दिल ।

वयकलं प्रधानमन्त्री, अर्थमन्त्री व नेपाल विद्युत प्राधिकरणया कार्यकारी अधिकृत दशवीया ल्वापु विदेशी लायया थासय् भ्नीगु देशया लाय छ्यलय्गु भ्रष्टाचरया विरोध याय्गु, अमेरिकी स्वार्थया लाय व अमेरिकी कानून अलय नीति डाल काय मालिगु एमसीसी सम्भौता खारेज याय्गु खायँ मखु मिलय जुयो राज्यया दुकुती लुटेयाडः नय्गु हे जुयमः धायोदिल । उकीं एमसीसी ज्यू धाइपुं फुक्क नेपाली जनताया शत्रु खः । अः अथेहे ८० प्रतिशत तिजक नेपःमि पिसं जक बिजुली च्याकय खाडः च्वंगु खाँ काडः दिल ।

नेमकिपाया केन्द्रीय दुजः नपां ख्वप नगरपालिकाया प्रमुख सुनिल प्रजापति जुं दलीय व्यवस्थाय् पार्टीया थःथःगु विचः

व सिद्धान्त मरुगु पार्टी मनूया भीड जक जुइगु खाँ व्याकसे एमालेया 'जनताको बहुदलीय जनवाद' माओवादीया 'एक्काइसौ शर्दी या जनवाद' चुनावं हे समाजवाद निः स्वानय्गु मार्क्सवादया अखः संशोधनवादी विचः खः संशोधनवाद पुँजीवाद खः । नेमकिपा उकिया विरुद्ध सैद्धान्तिक संघर्षयासे समाजवाद हयगु लौपुइ हज्याडः च्वंगु खाँ काडः दिल । इन्जिनियरपुं बौद्धिक समुदाय जुगुलिं थःमनं फयाथें देशं व जनताया सेवाखय् ज्या सानय् मःगु खाँ व्याकसे वयकलं संगठन जुयगुया तातुना धेबा व पदया लागिं मखुसे पार्टीया नीति काथं अपलं अपः जनताया भिं जुइगु ज्या याय् मः धायोदिल ।

वयकलं नेमकिपां निर्वाचनता जनताया चेतनास्तर थाकायगु नपां वर्ग संघर्ष काथं छ्यलः वयो च्वंगु खाँ नपां पुँजीवादीतयसं क्रान्तिकारीपिन्ता अःपुक चुनाव त्याकय मबियता (थ्रेस होल्ड) मतसीमा थजगु अप्रजातान्त्रिक खाँ ज्यात ल्ययो जनताया मत कुन्ठित याय्गु जःग्वयो च्वंगुलिं सचेत जुयमः धायोदिल ।

प्रमुख प्रजापति जुं राजनीतिक दल सम्बन्धी कानून हिलय ताडः अः देशय् नेगू दलया तानाशाही याय्तां नेका व एमाले जुयो च्वंगु खाँ व्याकसे नेका व एमाले गाथीया सरकारं बांलाक ज्या मसांगुलिं हे जुजुवादी तयसं कप ल्हाडः हःगु खाँ काडः दिल ।

ख्वप नगरपालिकाया उप प्रमुख नपां आर्किटेक इन्जिनियर रजनी जोशी जुं पुँजीवादी व्यवस्थां याडः हे ल्यासे ल्याम्होपुं इतिमिति काडः जूगु खाँ व्याकसे इन्जिनियरपिसं खबरदारी याय्ता हज्याय् मः धायोदिल ।

उगु मुंज्यासं वरिष्ठ इन्जिनियर राजेन्द्र हाडा, वरिष्ठ आर्किटेक सरोज बैद्य, ई. सत्यराम प्रजापति, ई. रुपेश प्रजापतिं नं न्वचु तयो द्यगु खः ।

## देश्य ल्यासे ल्याम्होपुं मदयो वांगुली सरकार हे दोषी

चैत्र १६ गते



निओ फ्युजन बाजा समुह व नवदुर्गा धिमे खलः या मंकः गवसालय् न्हँगु देँ २०८२ व बिस्का जात्राया भिन्तुना देछाय्गु नपां थीथी लयता पौ, हानय् ज्या व हना पौ लः ल्हाय्गु ज्याया म् पाहाँ खवप नगरपालिकाया प्रमुख सुनिल प्रजापति जुं नेवः बाजा व संस्कृति ल्यंकः म्वाकः व भिंक तय्गु नपां उकिता बुलुहुँ व्यवसायिकरण याडः यंक्य् मः धायोदिल ।

वयकलं भ्नीगु परम्परागत बाजात न्हँगु पुस्ताता लः ल्हाल्हां उकिया बोलत चवयो लिपिवद्ध याय् फःसा व म्वाडः च्वनिगु खाँ ब्याकसे ल्यासे ल्याम्होपुं, ब्वनामिपुं विदेश्य् वानिगु अपलं जुयो वसेलिं देश्य् मःपुं जनशक्ति मदयो वगु, सरकारं हे ल्यासे ल्याम्होपिन्ता सरकारं हे छँ बँ बैड्क्य् बन्धक तय्क विदेश्य् ख्याडः छ्वगु खाँ नपां देश्य ल्यासे ल्याम्होपुं मदयो वांगुलि सरकार हे दोषी खः धायो दिल ।

पुँजीवादी गणतन्त्रया विकल्प समाजवादी गणतन्त्र खः । जनतां लिडः हाकु तिनय धुंगु राजतन्त्र हकनं ल्याहाँ वै धाय्गु हल्ला जक खः व अः सम्भव मरु धायोदिसे वयकलं राजतन्त्रस्वयो गणतन्त्र

समाज विकासया कुनं स्वयं बलय् छपला हज्यागु खः। गणतन्त्रय् जनताया काय म्हाय नं राष्ट्रपति जुय दैगु खाँ व्याकः दिल ।

नेमकिपाया केन्द्रीय दुजः नपां खवप नगरपालिका वडा नं ७ या वडाध्यक्ष उकेश कवां जुं न्हँगु पुस्तां भाय व संस्कृति त्वः तः वांगुली चिन्ता प्वकसे संस्कृति व बाजागाजा ल्यंकः म्वाकः तय्ता देया थी थी जिल्लाय बाजा स्यनय् मःगु अलय शिक्षा व संस्कृति नपां नपां यंक्य् मः धायोदिल ।

निओ फ्युजन स्कूल अफ कम्प्युटरया निर्देशक बालकृष्ण बनमालां बाजा- गाजाख्य ल्यासे ल्याम्होपिन्ता स्वयो निःशुल्क स्यडः वयो चवडागु अलय थुकिता अज व्यवस्थित याडः यंक्यग् योजना दःगु खाँ काडः दिल ।

निओ फ्युजन बाजा पुचःया सल्लाहकार लक्ष्मीप्रसाद बनमालां भौखेल, ताथली, इथुली, वागीश्वरी अलय पोखराय् नं बाजा स्यडः वयागु खाँ काडः दिल ।



सवीन लेबाया सभा नायोलय् जूगु ज्या इवः सं नवदुर्गा धिमे खलः या निःस्वानामि दयाराम बनमाला व नवदुर्गा धिमे खलः या नायो नपां स्यनामि वालगोपाल बनमालाता प्रमुख प्रजापतिं हानय् ज्या याडः द्यूगु खः सा नपां सयकामिपिन्ता नं दसिपौ लःल्हाडः द्यूगु खः ।

## प्याखं ब्वज्या

खवप नगरपालिका पाखं चाय्कः तःगु खवप प्राविधिक अध्ययन संस्थानया नर्सिडया ब्वनामिपिसं खवप नगरपालिका वडा नं. १० य् सोमबार क्यंगु स्वास्थ्य सम्बन्धी जनचेतना मूलक प्याखं क्यंगु जुल ।



## स्वास्थ्य शिविर

चैत्र १६ गते

खवप नगरपालिका वडा नं. ६ या ग्वसालय् खवप नगरपालिकाया प्रमुख सुनिल प्रजापतिया मू पाहाँलय् ६ नं वडाया वडाध्यक्ष हरिराम सुवालया नायो सुई न्ह्याकगु मचाछँ सम्बन्धी स्वास्थ्य शिविरसं मू पाहाँ प्रजापति जुं दुर्गम जिल्लाया सर्वसाधारण जनतात सामान्य वास हे याय् मखाडः अकालं सीड च्वंगु खाँ काँकां सत्तासिन दलत जिम्मेवारी मज्गुलिं थजगु दुःख जुगु खाँ काडः दिल ।



खवप नगरपालिकां शिक्षा व स्वास्थ्यता हदायतयो ज्या साडः वगु खाँ काडः दिसे थी थी खवप सर्कलया कलेज व खवप अस्पताल थुक्किया दसु खः धायोदिल । नपां वयकलं जिवं फःसा जक समाजया लागिं बांलाकः ज्या याय् फँगु खाँ ब्याकसे खवप नगरपालिकां न्ह्यगू कलेजत चाय्कः सर्वसाधारणया काय्

मह्यायपिन्ता दांकः भिंकः बवंकः वयो च्वंगु खाँ काडः दिल । नेपाल क्रान्तिकारी किसान संघ खवप जिल्ला समितिया कजि नपां ५ वडाया दुजः गोविन्द दुवालं ल्वय हे तहांम्हा शत्रु खः धायो दिसे छँ मिसात छम्हा मफूतकिं परिवार हे मफुपुं थें जुइगुलिं मिसातय्सं थःगु स्वास्थ्य परीक्षण याकय्ता लज्या चाय् मज्गुगु, इलय हे ल्वय सिइके फःसा ल्वय लांकय् फँगुलिं मिसा मस्त सचेत जुयमः धायोदिल ।

समाजसेवी गोपीकृष्ण चांगुभारीं मिसामस्तय्सं थःगु स्वास्थ्य इलय ब्यलय् परीक्षण याकः फाइदा काय फँगु खाँ नपां मचाछँया शिविर खवप नगरपालिकां तयो बांलागु लिचवः वयो च्वंगु खाँ काडः दिल ।

खवप नगरपालिकां धेबा पुलः अस्पतालय् वानय् मफूपुं मिसा तय्ता बिचः याडः थी थी स्वास्थ्य शिविर व छँ छँ नर्सिडया ब्यवस्था याडः ब्यूगुलिं छुं भातिचा जूसां स्वास्थ्य लाभ जुगु खाँ कार्यपालिकाया दुज रोशन मैयाँ सुवालं काडः दिल । उगु ज्या इवः या सभानायो नपां वडाध्यक्ष हरिराम सुवालं ल्यासे ल्याम्होपुं लागु पदार्थ दुब्यसनी व मादक पदार्थ त्वडः छँ छँ ल्वापु थैगु जूयो वगुलि बिचः याय् मःगु खाँ ब्याकसे अजगु चिजं तापाक्क च्वनय् मःगु वडाया थी थी विकासय् वडाबासीपिनिगु साथ, ग्वाहाली बियो वगु नपां उपभोक्ता समिति पाखं पारदर्शिकाथं ज्या हज्याकः च्वंगु खाँ ब्याकः दिल ।

ज्या इवः सं वडाया दुजः सिद्धिराम अवालं मचाछँया शिविरं स्वास्थ्य लाभ जुइगु आशा प्वंकः दिल ।

## ५ वडाय् शिविर

चैत्र १६ गते

खवप नगरपालिका वडा नं ५ या ग्वसालय जूगु (नाक, कान, घाँटी) न्हायँ, न्हय्प व काँथुया स्वास्थ्य शिविरया उलेज्या याडः दिसे खवप नगरपालिकाया उप-प्रमुख रजनी जोशी जुं खवप नगरपालिकां शिक्षा व स्वास्थ्यता हदाय तयो ज्या साडः वयो च्वंगु खाँ ब्याकसे जिवं फःसा दक समूदाय व देशया सेवा याय् फँगुलिं उसायँ भिंकः तय मःगु खाँ नपां स्वास्थ्य शिविर तैगु इलय् फछिं फक्क नगरबासी पिंसं मौकाया फाइदा कायमःगु खाँ ब्याकसे अः मपुनिगु ल्वय अपः खानय् दयो वगुलिं नय त्वनय्गुलि बिचः याय् मः धायो दिल ।

ल्वय नपां ल्वाय्गु क्षमता अप्वयकेता आत्मबल दयमः

गु नपां स्वास्थ्य परीक्षण मदिकक याक च्वनय्मःगु खाँ न वयकलं धायो दिल ।

कार्यक्रम सभाया नायो नपां वडा नं ५ या वडाध्यक्ष योगेन्द्रमान बिजुकुछँ जुं अस्पतालय वानय् थाकुपुं थाकालिपुं जेष्ठ नागरिक पिन्ता बिचः याडः छँ थिइकः स्वास्थ्य शिविर चाय्कागु खाँ काडः दिल ।

ज्या इवः सं सामाजिक कार्यकर्ता पूर्ण गोपाल राजचल, स्वास्थ्य स्वयमसेवी राजमती ढुकुछु, वडा नर्स रीतिका फँगु नं न्वचु तयो द्यूगु खः । थुगु शिविर तय्ता खवप अस्पतालया चिकित्सक पुचः लं ग्वाहाली यागु खः । आना १३२ म्हा सिनं स्वास्थ्य परीक्षण याकगु खः ।

## उपसचिवपुं खवप नगरपालिकाय्

चैत्र १२ गते



नेपाल प्रशासनिक प्रशिक्षण प्रतिष्ठान (Innovating Public Policy: use of Evidence) विषयया न्ह्यन्ह्या स्यनय्गु ज्या इवः सं सयकचवंपुं प्रशिक्षार्थी उप सचिवज्युं पुं खवप नगरपालिकाया शिक्षा, भौतिक पूर्वाधार, सुशासन, सूचना व प्रविधि, नवीनता व उद्यमशीलता थी थी विषयया खवप नगरपालिकाय स्वः वय्गु इवल्य् खवप नगरपालिकाया प्रमुख सुनिल प्रजापति जुं नपालाडः अन्तरक्रिया याडः दिल ।

प्रशिक्षार्थी पुचःता लसकुस याडः दिसे प्रमुख प्रजापतिजुं खवप नगरपालिकाया ज्या इवः या बःचा हाकलं प्रस्तुतीकरण पिब्वसे खवप नगरपालिकनं शिशु स्याहार केन्द्र निसें स्नातकोत्तर तगिं तक शिक्षा बियो वयो चवंगु, आर्थिक रूपं कमजोरपुं ब्वनामिपिन्ता शैक्षिक ऋण व थी थी विषयलय विद्यावारिधि तक छात्रवृत्ति बियो वयागु खाँ काडः दिल ।

संविधान व कानुनय संघीयता वसां शासन सत्ताय् चवडः चवंपुं नेता प्रधानमन्त्री, मन्त्रीतयसं व चवय चवयया संघीय कर्मचारी पिन्के धःसा थःगु हे लाकः तय्गु एकात्मक सोच व चिन्तन दयों तुं चवंगु खाँ कुलः दिसे वयकलं संघ, प्रदेश व स्थानीय तहत मिलय जुयो जक संघीयता धिसिलाक हछ्याय् फैगु खाँ काडः दिल ।

खवप देता आदर्श नगरकाथं हछ्याय्गु कुतः नगरपालिकां याडः वगु खाँ ब्याकसे वयकलं नेपाल मजदुर किसान पार्टीया हानय् ब्रह्मा नायोभाजु नारायण मान बिजुकुछें (रोहित) जुं चवयो द्यगु सछिदा लिपाया खवप दे (सय वर्ष पछिको भक्तपुर) नाया साफ्या लिधांसाय लौपु काथं कायो खवप दे तस्कं बांलागु व यचुपिचुगु सहर काथं दयकेगु कुतः जुयो चवंगु खाँ ब्याकः दिल ।

प्रशिक्षार्थीपिसं न्यंगु न्ह्यसः या लिसः बियो दिसे प्रमुख प्रजापति जुं खवप नगरपालिकां स्थानीय जनताता सक्षम यायां स्वायत्तताया कुतः याडः, वयो चवंगु खाँ वयडः दिल । स्थानीय तहता सक्षम व सबल याडः- यंकयमःगु खाँय् बः बियोदिसे वयकल खवप नगरपालिकापाखं चाय्क तःगु शैक्षिक संस्थापाखं गरिब व जेहेन्दार ब्वनामिपिन्ता दायें प्यंगु करोड तिया छात्रवृत्ति बियो वगु खाँ काडः दिल ।

थःगु पहः या मौलिक छें व थानाया

सांस्कृतिक सम्पदात हे खवप देया आकर्षण (स्वय लाइकगु) जूगुलिं खवप देया थःगु पहः ल्यंकः म्वाकः तयता खवप देया पुलांगु नगर दुनयें छें दानिपुं छें थुवः पिन्ता आर्थिक ग्वाहाली याडः वयागु खाँ काडः दिल ।

आर्थिक समितिया कजि हरिप्रसाद बासुकलां युवा उद्यमशीलताया खायें खवप नगरपालिकां याडः वगु ज्याया खाँ काडः दिसे खवप नगरपालिकां युवा उद्यमशीलता ऋण बियो वगु, वांगु दायें निसें लघु उद्यम तालिम बियो वगु, अलय सेवाग्राही पिन्ता अनलाईन भुक्तानि वियता एप्सत दय्कः चवंगु खाँ काडः दिल ।

खवप नगरपालिकाया प्रमुख प्रशासकीय अधिकृत वसन्त भट्टराई जुं ज्या इवः न्ह्याकः द्यगु खःसा अन्तरक्रिया ज्या इवः सं स्टाफ कलेजया अध्ययन निर्देशक त्रिलोचन पौड्यालनपांया प्रशिक्षार्थी पिसं खवपया यातायातया अवस्था, फः (फुटपाथ), पार्किङ व्यवस्थापन व लाँया मता(सडक बत्ती), नगरपालिकापाखं न्ह्याकः चवंगु आवास योजना, खवपया विकासय् जनश्रमदान अवस्था डिजिटल नक्सा प्रणाली अनलाईन कर भुक्तानी प्रणालीया अवस्था, नगरपालिकाया उद्यमशीलता विकासया ज्या इवः सामाजिक सञ्जालया छ्यला, ज्यावियगु रोजगारीया अवस्था, घरेलु उद्योग प्रवर्द्धन नगरपालिकाया योजना, त्वनयगु नाः या भिं मभिं, मापदण्ड, सूचना प्रविधिया छ्यला, थजगु थी थी जिज्ञासा तयो द्यगु खः ।

अध्ययन भ्रमण पुचलय नेपाल सरकारया थी थी मन्त्रालय विभाग, आयोग, प्राधिकरणय ज्या साडः चवंपुं ३२ म्हा उपसचिव स्तरया कर्मचारीपुं भःगु खः ।

## समाजवादय् शिक्षा, स्वास्थ्य उपचारता धेवा पुलय म्वः



चैत्र २३ गते

नेपाल मजदुर किसान पार्टीया नायो भाजु नारायणमान बिजुक्छेँ (रोहित) जुं नेपः या सरकारं खवप नगरपालिकाता मेडिकल कलेज चाय्के ब्यगु जूसा गरिवया काय म्हायपिसं नं म्हवचा धेवां चिकित्सा शिक्षा ब्वनय खानिगु, देश व जनताया इमानदार जुयो ज्यासानिपुं देशभक्त नागरिकपुं ब्वलानिगु खाँ काडः दिल ।

वयकलं शासक दलत पुँजीपतिवर्ग व मेडिकल माफिया पिसं कतामारीया थें थःगु लाहापा ट्लायँ प्याखं ल्हुइकः तः गुलिं खवप नगरपालिकाता मेडिकल नपां खवप विश्वविद्यालय स्वीकृत मब्यगु खाँ काडः दिल ।

खवप नगरपालिकापाखं चाय्क तः गु खवप अस्पताल व बहुप्राविधिक अध्ययन संस्थानया कर्मचारीपुं मुडः शनिवार भिंतुना कालबिल नपां लाँपु क्यनयगु मार्ग निर्देशन ज्या इवः सं मू पाहाँ बिजुक्छेँ जुं समाजवादी दे क्युबाय् नेसम्हा नागरिकता छम्हा डाक्टर दःगु खाँ कुल दिसे समाजवादी देशय् शिक्षा, स्वास्थ्य उपचार सरकारया दायित्व जुयो फुक्क धेवा म्वायकः याडः बिइगु खाँ काडः दिल ।

खवप दे क्षेत्रफलया ल्याखं देया दकलय चिच्याक्वगु दे अलय राजधानी सतिगुनपां थानाया जनतात छप्पाछधि जुयो च्वंगु खाँ व्याकसे वयकलं खवपय् विकासनिर्माण, स्वास्थ्य उपचार सम्पदा ल्यंकः म्वाकः भिंक तयगु थजगु ज्याया सरकारं टेष्टट्युव काथं कायो नमूना ज्या यागु जूसा उकिं प्याहाँ वैगु बांलागु लिचवः

पाखं देङांकः छ्यलय् फैगु खाँ काडः दिल ।

जलाखाला समाजवादी चीन देशय् चतारं विकास जुगुलि सरकारया छगू छगू योजनात क्वयया तहलयतक तःक बैठकः च्वडः जनताता ग्वाकयगु नपां जनताया दश्वी थः धायगु भावना ब्वलाकय् विइगु खाँ अनुसन्धान सिय दःगु खाँ ब्याकसे नायो भाजु बिजुक्छेँ जुं नगरपालिका व खवप अस्पतालया फुक्क ज्या इवः व सेवा सुविधाया खायँ जनतातां काडंतुं च्वनय् मः धायोदिल ।

वयकलं तःकः बैठक तयो खाँ कासेलिं जनतां खाँ थुइ अलय नगरपालिकाया छगू छगू ज्या थःगु भः पियो नगरपालिका व अस्पतालता जनतां साथ व ग्वाहाली बिई धायो दिसे न्हँगु पुस्ताता थःगु मां भाय नपां मेगु स्वंगू भाय सयकेता धवासा बियमःगु खाँ स्वाडः दिसे चिकित्सक व स्वास्थ्य कःमिपिसं विरामीया मनया खाँ थुइकः उपचारया ज्या अज बांलाकयता विरामीया भासं हे थुइके मः धायो दिल । नपां संसारया न्हँ न्हँगु प्रविधि व वैज्ञानिक अनुसन्धानया खाँत सयकः थुइकः थःपुं च्वजायक च्वनयता सल्लाह बियो दिल ।

ज्या इवःसं सभाया नायो नपां खवप अस्पताल व खवप बहुप्राविधिक अध्ययन अनुसन्धानया संस्थान सञ्चालक समितिया नायो सुनिल प्रजापति जुं खवप अस्पताल जनताया अस्पताल खः धायोदिसे कर्मचारी पिन्ता जनताया नर्स व जनताया स्वास्थ्यकःमि जुयो इमानदार जुयो निःस्वार्थ काथं उपचार यायता धायोदिल ।

वयकलं काथं मछिंगुता काथं छिंक, सड्कटता अवसरख्य

हिलय्गु संकल्प ज्वडः कोभिड भवल्बयया महामारीया इलय् जनताया साथ व ग्वाहालीखय् २०७८ वैशाख १७ गते जनस्वास्थ्य केन्द्रता ख्वप अस्पतालय् च्वजाय्कागु नपां अक्सिजन प्लान्ट निःस्वाडः जनताता अक्सिजन सिंतिं बियागु खाँ काडः दिल ।

प्रमुख प्रजापति जुं भ्नीगु छगू छगू ज्या जनतां स्वयो धायो च्वनिगु खाँ नपां छगू चिच्याहांगु गल्तीं समाजय तःहांगु दुर्घटना फय मालय योगु खायँ सचेत यासे जनताया उपचार सेवाय् छुं भाति हे कमजोर मयाय्ता सकलसिता इनाप याडः दिल ।

उपप्रमुख रजनी जोशीं गरिब व आर्थिक अवस्था कमजोर जनतातय्ता थिकय्गु निजी अस्पतालया सेवा म्हवचा धेवां बांलागु च्वजायकः बियगु मतिं ख्वप अस्पताल चाय्कगु खाँ ब्याकसे नेपाल मजदुर किसान पार्टी क्यंगु लॉपु ज्वडः हे ख्वप नगरपालिका शिक्षा व स्वास्थ्यता हृदाय तयो ज्या साडः च्वंगु खाँ काडः दिल ।

नगरपालिकाया प्रमुख प्रशासकीय अधिकृत वसन्त भट्टराई जुं ख्वप नगरपालिकां ख्वपया जनताता धेवा म्वायकः अक्सिजन

## सच्छिव डय्जागूगु ख्वप पौ बः छि पौ (पाक्षिक)

व हि बियो वयो च्वंगु डाल काय बहगु ज्या खः धायो दिल ।

ख्वप कलेज अफ इन्जिनियरिङया प्राचार्य ई. सुनिल दुवाल, ख्वप कलेज अफ ल या प्राचार्य अधिवक्ता अनिता जधारीं नगरपालिकां चाय्कः तःगु शैक्षिक संस्थापाखं देशां देछिया ब्वनामिपिसं दांकः भिंकः, बांलाकः शिक्षा कायो वयो च्वंगु देशभक्त, अनुशासित इमान्दार व दक्ष न्हँगु पुस्ता ब्वलांकय्गु ज्या मदिकक न्ह्याडः च्वंगु खाँ काडः दिल ।

ख्वप बहुप्राविधिक अध्ययन संस्थानया इन्चार्ज ईश्वरी डंगोलं ख्वप अस्पतालय् ज्या साडः च्वपुं स्ववखय् नेव ख्वप बहुप्राविधिक अध्ययन संस्थानं ब्वलापुं हे खः धायोदिसे लयता प्वंकः दिल ।

ख्वप अपतालया निमित्त मेडिकल डाइरेक्टर डा. मजेश प्रताप मल्ल व भक्तपुर नगरपालिका स्वास्थ्य शाखा प्रमुख डा. रत्न सुन्दर लासिवं स्वास्थ्य सेवाखय् जुयो च्वपुं कर्मचारी पिन्ता मन च्वजायकेता मदिकक न्हयलुवापुं भायो लॉपु क्यडः द्यगु काथं जनताया सेवा याय् बलय् मन तस्कं लय तःगु नपां थःता गर्व जगु खाँ काडः दिल ।

## मचाछँया क्यान्सरया शिविर

चैत्र २४ गते

ख्वप नगरपालिका वडा नं. ७ या ग्वासालय जुगु निःशुल्क मचाछँया क्यान्सर सम्बन्धी स्वास्थ्य शिविर



इनाप

ख्वप नगरपालिका पाखं पिथाडः च्वंगु ख्वप पौ बः छि पौ खय् बांलागु च्वसु त बियो ग्वाहाली याडः दिसँ । उगु रचनाया ल्य ज्या याडः पारिश्रमिक बियगु खाँ ख्वप नगरपालिकाया २०७७ श्रावण २६ गते च्वंगु बैठकं

कवः छ्यगु खाँ ब्याक च्वडा ।

सम्पादक  
ख्वप पौ

# खपय् अन्तर नगर जिम्नास्टिकया धिं धिं बल्ला न्ह्यात

चैत्र २३ गते



नेपाल मजदुर किसान पार्टीया हानय बहम्हा नायो भाजु नारायणमान बिजुक्छेँ (रोहित) जुं खप नगरपालिकाया गवसालय चैत्र २३ गते निसेँ २५ गते तक न्ह्याडगु स्वन्ह्या नगर ब्यागु जिम्नास्टिकया धिं धिं बल्ला शनिवार पानसय मता च्याकः उलेज्या याडः दिल । वहे लसताय् वयकलं खप नगरपालिकापाखं पिथांगु- 'खेलकुद स्मारिका - २०८१' नं पिता ब्वज्या याडः दिल ।

खपया सहिद स्मृति कासा ख्यलय जूगु उलेज्या ज्या इवः सं मू पाहाँ विजुक्छेँ जुं धिं धिं बल्ला कासा तःजिक हानय् फयमः धायोदिसे जिम्नास्टिक कासा जोखिमपूर्ण कासा जूगुलिं सुरक्षित जुयो म्हितयता इनाप याडः दिल ।

प्याखं ल्हयगु व शारीरिक अभ्यासं शरीरया अंगत चलायमान जुयो फूर्ति दयक बिडगु खाँ ब्याकसे वयकलं कासा व्यक्तिकत रूपं शारीरिक तन्दुरुस्ती, मानसिक स्वस्थताया लागिं नपां दे हलिमय म्हासिडक बिडगु लिधंसा जूगु खाँ काडः दिल ।

कासामिपिन्ता थःगु कला व कौशल अनुशासित जुयो क्यनयता बःबियो दिसे नायोभाजु बिजुक्छेँ जुं सरकारं कासामिपिन्ता मन ग्वाकः हौसला व प्रोत्साहन बियमः धायो दिल ।

ज्या इवः या सभाया नायो नपां खप नगरपालिकाया प्रमुख सुनिल प्रजापति जुं छम्हा छम्हा ल्यासे ल्याम्हो व ब्वनामिपिन्ता छगू नं छगू कासाय् दुथ्याकय्गु खप नगरपालिकां ग्वाकः वयो च्वंगु खाँ ब्याकसे खप नगरपालिकां ब्वनय्कुथिसं कासा स्यनामित छ्वयो कासा स्यनय्गु याडः वगु उकिया खः

धायो दिल ।

दायें दायंपतिकं नगरब्यागु 'अन्तर नगर धिं धिं बल्ला कासा व ब्वनय्कुथि ब्यागु अन्तर विद्यालय धिं धिं बल्ला कासा याडः वगु नेपाल मजदुर किसान पार्टीया घोषणा-पत्र काथं याड वगु खाँ ब्याकसे वयकलं सकल नगरबासी पिन्ता उसायें भिंकः तयता, देशभक्त व अनुशासित राष्ट्रिय व अन्तरराष्ट्रिय कासामिपुं ब्वलांकय्गु मु तातूना तयो खप नगरपालिकां कासाया धिं धिं बल्ला व कासा स्यनय ज्या याडः वयागु खाँ ब्याक दिल ।

खप नगरपालिकाया उप-प्रमुख रजनी जोशीं जिम्नास्टिक कासा ख्यलय तस्कं बांलागु पाटा खः धायो दिसे ब्वनामिपिनिगु बौद्धिक विकासनपां शारीरिक व मानसिक विकासया लागिं कासा महत्वपूर्ण पक्ष खः धायोदिल ।

खपया प्रमुख जिल्ला अधिकारी गोपाल प्रसाद अर्याल जुं अन्तरनगर कासाया धिं धिं बल्ला याडः थी थी नगरपालिकाया





दशवी क्वातुगु स्वापु व अनुभव काल बिलखय् ध्वासा जुइगु विश्वास प्वंकः दिल ।

नेपाल जिम्नास्टिक संघया महासचिव मुकुन्द राज शर्मा ख्वप नगरपालिकाया ग्वसालय् जूगु अन्तरनगर जिम्नास्टिकया धिंधिं बल्लासं थः वय दःगुलिं लयता प्वंकसे हिंच्यागु महानगरपालिका, उपमहानगरपालिका व नगरपालिकाया दशवी जुइगु धिंधिंबल्ला राष्ट्रिय प्रतियोगिताया पहः काथं हज्यागु खाँ काडः दिल ।

ज्या इवःसं वडा नं १ या वडाध्यक्ष नपां युवा तथा खेलकुद समितिया कजि श्याम कृष्ण खत्री अन्तर नगर जिम्नास्टिकया धिंधिंबल्ला तःजिक क्वचाय्केता सकलसिया साथ व ग्वाहाली प्वंसे सकल नगरवासी पिन्ता स्वस्थय याड तय्ता

## सच्छिव ड्यडागुगु स्वप पौ, बःछि पौ(पाक्षिक)

राष्ट्रिय व अन्तरराष्ट्रिय कासामित ब्वलांकय्गु मू तातुना ज्वडः ख्वप नगरपालिकां कालाया धिंधिं बल्ला ग्वसः ग्वगु नपां स्यनय्गु ज्या न्ह्याकः वगु खाँ काडः दिल ।

भक्तपुर जिल्ला जिम्नास्टिक संघया नायो दिपककृष्ण प्रजापति कासाया धिंधिं बल्ला तः लायमः धाय्गु भिंतुना देछःसे कासामिपिन्ता अनुशासन व मित्रता तय्ता बः याडः दिल ।

ख्वप नगरपालिकाया प्रमुख प्रशासकीय अधिकृत वसन्त भट्टराई जुं भिंतुना न्वचु, वडा नं ४ या वडाध्यक्ष उपेन्द्र सुवाल सुभाय देछायो द्यूगु खः सा युवा तथा खेलकुद समितिया दुजः रामसुन्दर बासीं नं न्वचु तयो द्यूगु खः ।

कासा उलेज्या जुय हाँ वडा नं ९ दतात्रयं ग्याली नपां नगर चाहिल सहिद स्मृति कासा ख्यलय थ्यंकः सभा जूगु खः । ग्यालीसं ख्वप नगरपालिकाया जनप्रतिनिधिपुं, पूर्व जनप्रतिनिधिपुं, कर्मचारी, व्यापारी, व्यवसायी, शिक्षक, ग्वाहालिमिपुं, कासामिपुं, स्काउट, सुरक्षाकःमि पुं नपां थीथी ब्वनय्कुथिया ब्वनामिपुं वगु खः ।

समारोहसं रेफ्री पाखं पिन्की भ्राड व कासामिपिनिपाखं रेजिसा घेमोसुं नियमय च्वडः निष्पक्ष जुयो म्हितकेगु विश्वास प्वंकः शपथग्रहण यागु खः ।



**ख्वप नगरपालिकाता न्ह्याबले सफा,  
सुघर तय्गु सकल नगरवासीतय्गु कर्तव्य खः ।**

## स्वभाल

चैत्र २४ गते

नेपाल मजदुर किसान पार्टीया नाथो भाजु नारायण मान बिजुकुछँ (रोहित) जुं खप नगरपालिकाया गवसालय चैत्र २३ गते निसँ २५ गते तक जूगु जिम्नास्टिकया धिं धिं बल्ला स्वयो दिल ।

अथेहे खप नगरपालिकाया गवसालय जूगु जिम्नास्टिकया धिं धिं बल्ला स्वयो दिसे नेपाल मजदुर किसान पार्टीया छ्याञ्जे नपां संघीय सांसद प्रेमसुवाल ।



## नगर ब्यागु जिम्नास्टिकया धिं धिं बल्ला क्वचाल

चैत्र २५ गते



खप नगरपालिकाया गवसालय २०८१ चैत्र २३, २४ व २५ गते स्वन्हू यंकं जूगु नगर ब्यागु अन्तर नगर जिम्नास्टिकया धिं धिं बल्ला क्वचाय्धुकं: जूगु समारोह व सिरपा लः ल्हायगु ज्या इवः सहिद स्मृति कासा खयलय् जुल । उगु धिं धिं बल्लासं खप नगरपालिका न्हाप, मध्यपुर थिमि नगरपालिका ल्यू व चन्द्रागिरी नगरपालिका ल्यूया ल्यू लागू खः । ज्या इवः सं नेपाल मजदुर किसान पार्टीया छ्याञ्जे नपां संघीय सांसद प्रेम सुवाल जुं कासा

स्वास्थ्य, अनुशासन, मित्रता व देया सार्वभौमिकता रक्षाया नितिं खः धायोदिसे कासाया लिधंसाय स्वागु स्वापु धिसिलाक तयमः धायो दिल ।

नागरिकपुं अनुशासित जूसा जक दे तःमि जुइगु खँ ब्याकसे वयकलं नागरिकपिन्के कर्तव्य थुयवं तिति दे दय्केता अलय् समाज व्यवस्थित काथं हज्याय्ता ग्वाहाली जुइगु धायो दिल ।

## सच्छिव डयडागूगु खवप पौ, ब.खि पौ(पाक्षिक)

कासमिपिसं थःगु कासा जीवन नपां नपां विद्यालय व विश्वविद्यालयया शिक्षा नं नपां नपां यंक्यु फःसा व्यक्तित्व विकासय अपलं महत्वपूर्ण भूमिका म्हितिगु खाँ काडः दिल । नपां वयलं जलाखाला दे भारत नेपः या अपलं भूभाग त्यलः च्वंगु खाँ न्हासा देया सिमाना रक्षा याइपुं न्हंगु पुस्ता ब्वलांकयगु मू थाय नं कासाख्य हे खः धायो दिल । जनताया माग सम्बोधन जुइगु राजनीतिक व्यवस्था समाजवादी गणतन्त्र खः धायो दिसे वयकलं साम्राज्यवादी देश अमेरिका इजरायलता ल्वाभः मियो प्यालिस्टिनी जनताता बर्बर हमला व बमबारी याडः च्वंगु खाँ काडः दिल ।

खवप नगरपालिकाया प्रमुख सुनिल प्रजापति जुं छम्हा छम्हा ल्यासे ल्याहोपिन्ता छगू नं छगू कासाख्य दुथ्याकयगु अलय कासाता जीवन पद्धति काथं हज्याकः यंक्यु तातुडः खवप नगरपालिकां कासाया धिं धिं बल्ला मदिकक याडः वयो च्वंगु खाँ नपां नेगू महानगर, छगू उप महानगर नपां हिंच्यागु नगरपालिकातयसं ब्वतिकायो तःजिक क्वःचःगु थुगु कासाया धिं धिं बल्लां कासा ख्यः या इतिहासय छपा अपा तांगु खाँ काडः दिल ।

खवप नगरपालिकां सरकारया भरय मच्वंसं थःगु हे तुतिखं चुयो खवप देता हज्यायगु कुतः याडः च्वंगु खाँ नपां देया सिमाना रक्षा व सार्वभौमिकता रक्षा याइपुं न्हंगु पुस्ता ब्वलांकयगु तातुडः कासा लागता हदाय तयो ज्या साडः वयो च्वंगु खाँ काडः दिल ।

वागमती प्रदेश सभाया सांसद सृजना सैजुं जिम्नास्टिकया धिं धिं बल्ला सं मिसामस्त नं ब्वति कः गुलिं मन च्वजःगु खाँ ब्याकसे खवप नगरपालिकां याडः वगु कासाया ज्या इवलं देया कासा लागाय तस्कं ध्वासा जूगु खाँ काडः दिल ।

वयकलं राज्यया उदासिनताया विरुद्धय गतिलागु पला खवप नगरपालिकां छिडः वगु खाँ ब्याकसे समाजवादी गणतन्त्र हे जक ज्यासाड, नैपुं वर्गया प्रजातन्त्र खः धायोदिल । ज्या इवः सं भक्तपुर जिल्ला जिम्नास्टिक संघया नायो दिपक कृष्ण प्रजापतिं कासा तः जिक क्वःचःगुलिं स्वापुदःपुं सकलसिता सुभाय दे छासे जिम्नास्टिकया धिं धिं बल्ला यागुलिं कासामि पिनिगु मनहवगु खाँ काडः दिल ।

ज्या इवःसं मू पाहाँ सुवालं त्याकपुं कासामिपिन्ता दसि पौ, शिल्ड व धेबा सिरपा लः ल्हाडः बियो द्यगु खः । विशेष पाहाँ व पाहाँपिसं ब्वतिकःपुं नगरपालिकता मतिनाया चिं व त्याकपुं कासामिपिन्ता सिरपा लः ल्हाडः ब्यगु खः ।

ज्या इवः सं खेलकुद समितिया कजि श्यामकृष्ण खत्री लसकुस न्वचु, प्रमुख प्रशासकीय अधिकृत वसन्त भट्टराई जुं



सुभाय देछायो द्यगु खःसा वडाया दुजः राम सुन्दार बासीं नं न्वचु तयो द्यगु खः ।

खवप नगरपालिकां ग्वसः ग्वगु उगु जिम्नास्टिकया धिं धिं बल्लासं येँ व यलय महानगरपालिका नपां हिंच्यागु नगरपालिकां ब्वतिकःगु खःसा उगु धिं धिं बल्ला कासा नेपः या न्हापांगु धिं धिं बल्ला काथं खवप नगरपालिकां ग्वसः ग्वगु खःसा न्हाप लागू पुचःता डयद्वतका, ल्यू लागु पुचःता स्वीद्वतका व ल्यूया ल्यू लागू पुचः ता नीद्वतका सिरपाया व्यवस्था यागु खःसा दुतिपुं कासामि व अफिसियलपिन्ता नयगु च्वनयगुया व्यवस्था यागु खः ।

धिं धिं बल्ला कासाया लिच्वः

न्हाप : खवप नगरपालिका

ल्यू- मध्यपुर थिमी नगरपालिका

ल्यूया ल्यूः चन्द्रागिरी नगरपालिका

सिनियर ब्वाइज टप १४ (अल राउन्डर)

रामग्राम नगरपालिकाका रोहन बुढाथोकी – प्रथम

मध्यपुर थिमी नगरपालिकाका सुमन तामाड – दोस्रो

चाँगुनारायण नगरपालिकाका विज्ञान भैल – तेस्रो

सिनियर ब्वाइज टप ८ (फ्लोर)

भक्तपुर नगरपालिकाका सुमित तामखू – प्रथम

भक्तपुर नपाका अर्नेष्ट सुवाल – दोस्रो

रामग्राम नगरपालिकाका रोहन बुढाथोकी – तेस्रो

सिनियर ब्वाइज टप ८ (भल्ट)

रामग्राम नगरपालिकाका रोहन बुढाथोकी – प्रथम

भक्तपुर नपाका सुमन नापित – दोस्रो

चाँगुनारायण नपाका विज्ञान भैल – तेस्रो

सिनियर गर्ल्स टप १४ (अल राउण्डर)

भक्तपुर नपाका रेगिसा घेमोसू – प्रथम

रामग्राम नगरपालिकाका विदिशा न्यौपाने – दोस्रो

रामग्राम नपाका चन्द्रकला खड्का – तेस्रो

सिनियर गर्ल्स टप ८ (फ्लोर)

## सच्छिव डयडागूगु खवप ढौ. बःखि ढौ(ढाक्षिक)

मध्यपुर थिमीका प्रकृति थापा मगर – प्रथम  
 भक्तपुर नगरपालिकाका रेगिसा घेमोसू – दोस्रो  
 रामग्राम नपाका चन्द्रकला खड्का – तेस्रो  
 सिनियर गर्ल्स टप ८ (भल्ट)  
 रामग्राम नपाका अन्जना थोकर – प्रथम  
 रामग्राम नपाका चन्द्रकला खड्का – दोस्रो  
 भक्तपुर नपाका रेगिसा घेमोसू – तेस्रो  
 जुनियर गर्ल्स टप १४ (अल राउण्डर)  
 काठमाडौं महानगरपालिकाका जोया मानन्धर – प्रथम  
 ललितपुर महानपाका चेरिस्मा अर्याल – दोस्रो  
 ललितपुर महानपाका एनोल दाहाल – तेस्रो  
 जुनियर गर्ल्स टप ८ (फ्लोर)  
 ललितपुर महानपाका कृसा महर्जन – प्रथम  
 काठमाडौं महानपाका कृसु भट्टराई – दोस्रो  
 काठमाडौं महानपाका जोया मानन्धर – तेस्रो  
 जुनियर गर्ल्स टप ८ (भल्ट)  
 काठमाडौंका महानपाका जोया मानन्धर – प्रथम  
 सूर्यविनायक नपाकाका भूमिका लामिछाने – दोस्रो  
 भक्तपुर नपाका तुलिसा कोजु – तेस्रो  
 जुनियर ब्वाइज टप १४ (अल राउण्डर)  
 भक्तपुर नपाका लिज अवाल – प्रथम  
 भक्तपुर नपाका ब्रायन लवजू – दोस्रो  
 पोखरा उपमहानपाका टनिक्स थापा – तेस्रो  
 जुनियर ब्वाइज टप ८ (फ्लोर)  
 भक्तपुर नपाका रिसब जाकिबन्जार – प्रथम  
 भक्तपुर नपाका लिज अवाल – दोस्रो  
 वालिङ नगरपालिका सोनिस थापा – तेस्रो  
 जुनियर ब्वाइज टप ८ (भल्ट)  
 मध्यपुर थिमी नपाका रामकुमार खड्का र भक्तपुर नपाका  
 लिज्व अवाल – प्रथम  
 पोखरा उपमहानपाका सिमोन थापामगर – दोस्रो  
 जुनियर गर्ल्स टिम प्रथम : चन्द्रागिरी नपा  
 चन्द्रागिरी नपाका याना पि.सी., राजश्री प्रधान, अर्या थापा र  
 आराध्या महत  
 जुनियर गर्ल्स टिम दोस्रो : मध्यपुर थिमी नपा  
 समीक्षा श्रेष्ठ, विज्ञता श्रेष्ठ, अद्विती प्रजापति र गीता साउद  
 जुनियर गर्ल्स टिम तेस्रो – काठमाडौं महानपा  
 कृसु भट्टराई, हर्षालि रन्जित, सुरभी श्रेष्ठ, जोया मानन्धर  
 जुनियर ब्वाइज टिम प्रथम– भक्तपुर नगरपालिका  
 ब्रायन लवजू, प्रनिस माक, रिसब जाकिबन्जार र लिज अवाल

जुनियर ब्वाइज टिम दोस्रो – मध्यपुर नगरपालिका  
 रुजेन श्रेष्ठ, प्रयुष श्रेष्ठ, रेहान श्रेष्ठ र रामकुमार खड्का  
 जुनियर ब्वाइज टिम तेस्रो – बनेपा नगरपालिका  
 विनायक देवकोटा, असल जोशी, आरोज गिरी र आसिसकुमार  
 साह  
 सिनियर गर्ल्स टिम प्रथम – रामग्राम नगरपालिका  
 विशेष न्यौपाने, अन्जना थाकोर, सुमा तामाङ र चन्द्रकला खड्का  
 सिनियर गर्ल्स टिम दोस्रो – भक्तपुर नगरपालिका  
 रिगिसा घेमोसू, रिजु रन्जित, चेरिसा प्रजापति, सिनोन बासुकला  
 सिनियर गर्ल्स टिम तेस्रो – मध्यपुर नगरपालिका  
 दुधकला साउद, सिताकुमारी खड्का, प्रकृति थापामगर र आर्या  
 रन्जितकार  
 सिनियर ब्वाइज टिम प्रथम – भक्तपुर नगरपालिका  
 गौरव तुल्लिबाख्यो, अर्नेस्ट सुवाल, सुमन नापित, सुमित तमखू  
 सिनियर ब्वाइज टिम दोस्रो – रामग्राम नपा  
 सुनिल बुढाथोकी, विश्वास सुवेदी, आर्या केसी, रोहन बुढाथोकी  
 सिनियर ब्वाइज टिम तेस्रो – मध्यपुर नपा  
 सृजन राजभण्डारी, सुरेन्द्र तामाङ, सुमन तामाङ र शिवजी  
 भण्डारी



न्याप : खवप नगरपालिका



न्यु- मध्यपुर थिमी नगरपालिका

## नपा लःवल



नेपाल मजदुर किसान पार्टीया नायो भाजु नारायणमान बिजुक्छे (रोहित) जुं कासा नं छगू लडाईं वा संघर्ष खः धायोदिसे कासाखय् लिचिलयगु धायगु बिसे वानयगु मखु धायो दिल ।

खवप नगरपालिकाया गवसालय जूगु अन्तर नगर जिम्नास्टिकया धिंधिबल्ला सं ब्वति कःवपुं हि च्यागू नगरपालिकाया कासा स्यनामिपुं अफिसियल व कासामिपुं नपां आइतबार जूगु नपालायगु ज्या इवःसं नायो भाजु बिजुक्छे जुं सरकारं याडः बिइ दक मखु छगू छगू स्थानीय तहं थःगु तुतिखय् दाडः हजयाय धायगु मति तःसा देश मथां हज्याई धायो दिल ।

कासा अनुशासन व मित्रताया लागि तस्कं महत्वं जःगु खाँ व्याकसे वयकलं कासाता जीवन पद्धति काथं हज्याकय् फःसा नागरिकपुं स्वस्थ जुइगु अलय स्वस्थ नागरिकपिसं जक देया सार्वभौमिकता रक्षायाय् फैगु खाँ काडः दिल नपां ल्यासे ल्याम्होपुं देशता न्हयाकिपुं शक्ति खः । छगू छगू ब्वनयकुथि कासा स्यनामिपुं तय फःसा बांलाइगु खाँ काडः दिसे गुकीं ल्यासे ल्याम्होपुं ब्वनामिपिन्ता अनुशासित याय फै, अनुशासित ल्यासे ल्याम्होपुं ब्वनामिपिन्ता कासां स्वस्थ याईधायोदिल ।

संसदय राजनीतिशास्त्र ब्वडः च्वंपुं सांसद पुं म्हवँजक दःगुलिं संसद संसदथें मजगु खाँ ब्याकसे वयकलं कासामि व कासास्यनामिपिसं नं राजनीति शास्त्र ब्वनय् मः धायो दिल ।

खवप नगरपालिकाया प्रमुख सुनिल प्रजापति जुं खवप नगरपालिकां शिक्षा, स्वास्थ्य उपचार, सम्पदा ल्यंकः म्वाकः तयगु, सुचुकुचु व ज्या बियगु खायें याडः वगु ज्याया बःचा हाकलं काडः दिसे नगरपालिकां नेपः या संविधान व स्थानीय सरकार सञ्चालन ऐन २०७४ रं ब्यगु अधिकार छ्यल ज्या याडः वगु खाँ काडः दिल ।

वयकलं खवप नगरपालिका थाना तक थयंकय्ता न्हय्लुवापिनिगु तःहांगु लाहा दःगु खाँ नं काडः दिल ।

खवप नगरपालिका वडा नं. १ या वडाध्यक्ष श्यामकृष्ण खत्री जुं कासा लागाय् खवप नगरपालिकां याडः च्वंगु ज्या इवः या बचा हाकलं काडः दिल ।

हिंच्यागुंतुं पालिकाया स्यनामिपिन्ता प्रमुख प्रजापति जुं नगरपालिकाया पिथनात उपहार काथं बियो दिल ।



ल्याया ल्युः चन्द्रागिरी नगरपालिका



## नगर ब्यागु जिम्नारिक्तकया धिंधिं बल्ला

प्रेस विज्ञप्ति

पात्रकार पासापुं

खप नगरपालिकां शिक्षा, स्वास्थ्य, सम्पदा ल्यंक: म्वाक: तयगु नपां कासाया लागाय् नं हृदाय तयो ज्या साडः वगु दः । ब्वनयकुथिया ब्वनामिपुं व ल्यासे ल्याम्होपिन्ता जिउ बांलाकः उ सार्थे भिंकः फूर्ति द्यक तय्ता छगु नं छगु कासाय् ब्वति काय्कः तयम धायगु काथं खप नगरपालिकां भलिबल, फुटबल, करँटे, बक्सिङ्ग, टेबुल - टेनिस, जिम्नारिक्तक थजगु खुगु कासाता मदिक्क स्यनय् ज्या याडः वयो च्वंगु दः । खप राष्ट्रिय व अन्तरराष्ट्रिय कासामिपुं ब्वलांकय्गु नपां कासाया लागानं खपया नां च्वजायकेगु उगु स्यनय्ज्याया तातुना खः ।

थाकालिपुं जेष्ठ नागरिक, ब्वनामिपुं नपां ल्यासे ल्याम्होपिन्ता नपां सकल नागरिकपिसं अःपुक अभ्यास याय फैगु श्वासप्रश्वास नपां स्वापु दःगु छिकोङ्गा शारीरिक अभ्यासया नं वडा वडाय् स्यडः वयो च्वंगु दः । सय्कः वपुं सयकामिपिनिपाखं हे स्यनामि ब्वलांकय्गु तातुडः २७ म्हा छिकोङ्गाया सयकामिपिन्ता स्यनामि दयकेगु तालिम माघ ९ गते निसं १७ गते तक बियो क्वचाय धुंकल । ब्वनयकुथि नं कासा हज्याकय्गु तातुडः वांगु प्यदा हौं निसं पूर्णकालीन कासा स्यनामिपुं छवयो कासा स्यनय्गु ज्या मदिक्क न्ह्याक च्वंगु दः । ब्वनयकुथिया मियामस्तय्ता आत्मरक्षा सम्बन्धी प्रशिक्षण नं न्ह्याकः वयागु दः । २०८० कार्तिक १७ गते निसं २४ गते तक नगर दुनयया ४९ गू ब्वनय कुथिया कासा स्यनामि शिक्षकपिन्ता छवःया प्रशिक्षक प्रशिक्षण तालिम बियागु जुल ।

नेपाल मजदुर किसान पार्टी स्थानीय तहया चुनाव्य घोषणापत्र काथं वियागु बचं मध्ये दार्थे दार्थे पतिकं छगु अन्तर नगर खेलकुदया ग्वसः ग्वयो धिं धिं बल्ला यायगु नं छगु खः । निर्वाचनया इलय जनताता ब्यूगु बचंकाथं खप नगरपालिकां दार्थे दार्थे पतिकं नगर ब्यागु कासाया धिं धिं बल्लायडः वयो च्वंगु खाँ नं थुगु लसताया इलय थाना ब्याक च्वडा । न्हापांगु दार्थे भलिबल, नेगुगु दार्थे करँटे, स्वंगुगु दार्थे एथलेटिक्स, प्यंगुगु दार्थे च्सेस, डगुगु दार्थे खो खो व वांगु दार्थे मिसा मस्तय्गु कबड्डी कासाया धिं धिं बल्ला बांलाक, क्वचाल । सहिद दिवसया लसताय जूगु ज्या इवःसं नगर प्रमुख सुनिल प्रजापति जु थुगुसी काथंछिंगु इलय अन्तर नगर कासाया धिंधिंबल्ला यायगु क्वः छिडः दिल । उकिलिपा खपय मदिक्क ज्या साडः च्वपुं जिम्मेवार कासा स्यनामिपुं व कासामिपुं नपां खँलाबल्हा जुल । वयकपिनिगु सल्लाह-सुभावा काथं खप नगरपालिकाया कार्यपालिका बैठकं २०८१ साल चैत्र २३ गते निसं २५ गते अन्तर नगर जिम्नारिक्तकया धिं धिं बल्ला यायगु खाँ क्वः छ्युगु खः । कासा तःजिक हानय्ता नगर प्रमुखया कजिलय १५१ दुजः दःगु 'मूल आयोजक समिति' - (ग्वसा खलः) व हिस्वंगु विषयगत कासा पुचः त निस्वांगु जुल । व फुक्क पुचलं थःता ब्यूगु जिम्मेवारी काथं ज्या साडः च्वंगु दः । दार्थे - दार्थेपतिकं बांलाक क्वचःगु कासां जिमिगु मन अज च्वजायकः ब्यूगु दः । जिमिसं जिमिगु बचं बांलाक हे क्वचाय्के ।

थुगुसिया अन्तरविद्यालय कासाया धिंधिंबल्ला नं क्वचाय्के धुन । उगु धिंधिंबल्लासं नगर दुनयया ९२ गू ब्वनयकुथि मध्ये ८५ गू ब्वनयकुथि ब्वतिकःगु खः । जिम्नारिक्तक कासाय मन ह्वयकः दुतिंगु खः । नीछगु ब्वनयकुथि जिम्नारिक्तक ब्वतिकःगु खः थुगुसी निसं स्थानीय पाठ्यक्रम दुनयया 'प्यकुं धुँ' कासायाय् नं धिं धिं बल्ला याडागु खः । धिं धिं बल्लाया १५ गू विधामध्ये प्यकुं धुँ म्हितिपुं कासामिपिसं मन च्वजायकः ब्वतिकःगु खानय् दः । थजगु कासा खय् वैगु दिनय् अभ् अपः ब्वनय कुथिं ब्वति काङ्गु आशा याडा ।

खप नगरपालिकाया ग्वसालय जुङ्गु थुगु जिम्नारिक्तकया धिं धिं बल्ला नेपाल जिम्नारिक्तक संघं मान्यता दःगु धिंधिं बल्ला खः । थुगु धिं धिं बल्लाय् यँ, यल महानगर नपां देया थी थी १८ गू नगरपालिकां ब्वति काय्ता नाँ च्वकय धुंकल । ब्वतिकःपुं नगरपालिकातः १) यँ महानगरपालिका २. ललितपुर महानगरपालिका ३. खप नगरपालिका ४. चाँगुनारायण नगरपालिका ५. सूर्यविनायक नगरपालिका ६. मध्यपुर थिमि नगरपालिका ७. बाग्लुङ नगरपालिका ८. रामग्राम नगरपालिका ९. भौत (बनेपा) नगरपालिका, ९. हेटौडा उपमहानगरपालिका, ११. गोकर्णेश्वर नगरपालिका, १०. शंखरापुर नगरपालिका, १३. चन्द्रागिरी नगरपालिका, १४. वालिङ नगरपालिका, १५. केपु नगरपालिका १६. पोखरा महानगरपालिका, १७. बुढानिलकण्ठ नगरपालिका अलय १८. नागार्जुन नगरपालिका खः । अन्तर नगर जिम्नारिक्तकया धिंधिंबल्ला नेपालय दकलय न्हापां जुगु धिंधिंबल्लाय् काथं खप नगरपालिकां ग्वसः ग्वयो न्ह्याकय् तांगु दः । धिं धिं बल्लाय् न्हाप लागू पुचःता ड्यद्वतका, ल्यूलागु पुचः ता स्वीद्वतका व ल्यू या ल्यू लागू पुचःता नीद्व तका नगद सिरपाया व्यवस्था याडः तःगु दः । ब्वतिकःपुं कासामिपुं व अफिसियल पिन्ता नयगु त्वनयगुया व्यवस्था याडः तःगु दः ।

धिं धिं बल्लाया उलेज्या नेपाल मजदुर किसान पार्टीया हानय्बहम्हा भाजु नारायणमान बिजुकुँ (रोहित) जुं याडः दी । चैत्र २३ गते निसं २५ गतेतक जुङ्गु जिम्नारिक्तकया धिंधिं बल्लाया उलेज्या य्याली खप नगरपालिका वडा नं ९ दतात्रयया हः नय् नं सुथाय् सिया ८:०० बजे न्ह्याडः तचपाल, इनाचो, सुकुल ढोका, तःमाही, नासमना, भार्वाचो, दुधपाटी जुयो नगरया मुख्य बजार चाहिलः सहिद स्मृति कासा ख्यलय थ्यंक उलेज्या जुई । थुगु धिं धिं बल्लाया खाँ थःथः गु सञ्चार माध्यमपाखं अपलं प्रचार-प्रसार याडः ग्वाहाली याडः, दियता सकल सञ्चारकःमि पासापिन्ता खप नगरपालिका पाखं दुनुगलं निसं इनाप याय् ।

खप नगरपालिका

न्हि ल्याः २०८१ चैत्र २१ गते

## व्यवसायिक प्रतिभा पिज्वयकेता हाटबजार

चैत २७ गते



खवप मा.वि., खवप कलेज, शारदा क्याम्पस मा.वि. व खवप कलेज अफ ल खय् ब्वडः च्वंपुं ब्वनामिपिन्के दःगु व्यवसायिक प्रतिभा पिज्वयकेगु तालुडः न्ह्याकगु नेकगु खवप हाट बजारया उलेज्यायासे खवप मा.वि./कलेज सञ्चालक समितिया नायो नपां खवप नगरपालिकाया प्रमुख सुनिल प्रजापति जुं कृषि सामग्री विक्री वितरण नपां घरेलु अलय् चिच्या चिच्याहांगु घरेलु तथा साना व्यवसायिक प्रवर्द्धन याय्ता हाटबजारं बांलागु योगदान वियो च्वंगु खाँ ब्याकसे ज्या भ्वःतःलाय्मः धायोदिल ।

तःतः हांगु डिपार्टमेन्टल स्टोरे थजगु व्यवसायीपिसं याडः हाटबजारत ताडः वांसेली देया लाय् नेम्हाप्यम्हा मनूतय्गु लाहातय् लःवांगु खाँ ब्याकसे वयकलं ब्वनामिपिन्के दःगु उद्यमशीलताता हज्याक यंकय्ता अलय थःगु तुतिखय दानय फयकेता कलेज ब्वनय्कुथिपाखं रचनात्मक ज्या त नपां थजगु ज्याभ्वः मदिकक याय्मः धायो दिल ।

## कर्मचारी पिसं न्हँ न्हँगु प्रविधि सिडकः हज्यायमः

चैत्र २७ गते

खवप नगरपालिकाया प्रमुख सुनिल प्रजापतिजुं नेपाल नगरपालिका कर्मचारी एशोसियसन पाखं पिथांगु २०८२ सालया भित्तेपात्रो पिता ब्वज्या यासे कर्मचारीपिसं न्हँ न्हँगु प्रविधिया खाँ थुइकेता ब यासे अःप्रविधि मस्युपुं मनूत अशिक्षित थें जुइगु खाँ काडः दिल ।

हलिमय विज्ञान व प्रविधिसं हज्यागु देशजक मथां विकास जुगु खाँ नपां चीन हज्याय फःगु खोज अनुसन्धान हे खः धायोदिसे वयकलं अमेरिका हलिमय वर्चस्व तोडय यायफःगु देश खः अथेनं हलिमयया मेमेगु देशनपांया व्यापारिक वस्तुखय् करकायगु नीति कायो हज्याडः च्वंगु दःगु खाँ नपां नखा-चखाया इलय फुर्सद दैबलय कर्मचारी पिसं ब्वनय्गुलि ध्यान तयो थःगु स्वयो देव जनताया भिं ज्याखय् ज्या याय् म धायो दिल ।

खवप नगरपालिकाया उपप्रमुख रजनी जोशीं

विदेशय ज्या मः वानय्गु नामय गां गामय् मनुहे मदयो वांक विदेशय् वानिगु ज्या पानय्ता, दक्ष जनशक्ति ब्वलांकः थःगु तुतिखय दानय् फयकेता खवप नगरपालिकां थी थी लाहातय ज्या दैगु तालिमत वियो च्वंगु, तालिम काय धुपिन्ता नगरपालिकां दांकः ब्याजं व्यवसायिक ऋण बियो वगु खाँ काडः दिसे वयकलं हाटबजार चाय्कः सेलिं स्थानीय अलय भ्नीगु मौलिक सीपता हछ्याडः यंकय् मः धायोदिल ।

ज्याभ्वःया कजि नपां खवप इन्क्यूबिशन ल्यावया कजि उपप्राध्यापक अञ्जु ग्वाछां साफूतिजक लिक्कुडः च्वंगु ज्ञानता व्यवहारिकता बियता अलय ब्वनामिपिन्ता उद्यमशील याय्ता ज्याभ्वःगवसःगवयागु खाँ ब्याकः दिल ।

अथेहे शिक्षक सुनिता गाईसिं ज्याभ्वः याय् मःगुया खाँ काडः दिल । हाटबजारय् हस्तकला, नसा ज्वलं, घरेलु उत्पादन, खाद्य सामग्री, साबुन श्रृङ्गार नपांया स्टलत तयो तःगु खः।

स्टलतःपु ब्वनामिपिन्ता मन च्वजायकेता कलेज/ब्वनकुथि ज्या साडः च्वंपुं शिक्षकपिन्ता म्हुवचा खय् नं डास तका याति सामान न्याडःबियता इनाप यागु खाँ कलेज/विद्यालय प्रशासनं धःगु दः ।

हाटबजारय् हिंछगूतगिं निसेंया एमबीएस तकया ब्वनामिपिसं पुचःदय्क नीच्यागु स्टल तःगु खः । उकिमध्ये बी बी एम या ब्वनामि एलेन सिमाछ्वाया न्हयलुवाय् पुचता च्वजःगु पुचः क्वछिडः नगद सिरपा व दसिपौ लः ल्हागु खः ।



## सच्छिव डयडागुगु खवप पौ. ब.छि पौ(पाक्षिक)

खवप नगरपालिकाया प्रमुख प्रशासकीय अधिकृत वसन्त भट्टराईजुं सूचना, प्रविधि व डिजिटाइजेशनया युगय् सरकारी सेवा फक्व मथां वियमःगु नपां कर्मचारी सं थः ता ब्यगु जिम्मेबारी इमानदार जुयो क्वचायके मःधायो दिल । स्थानीय तहया जनप्रतिनिधि व कर्मचारीया दशवी ला व लुसिथे स्वापु दयमःगु खाँ व्याकसे वयकलं कर्मचारीपिसं सृजनात्मक ढङ्गं ज्या सानय् मःधायो दिल ।

एशोसियसनया नायो गौतमप्रसाद लासिवां कर्मचारी एशोसियसनं दायं दायंपतिकं भित्तेपात्रो पिकाय्गु नपां मेमेगु

सन्देशमूलक साफूत पिथाडः कर्मचारीपिनिगु हकहित पक्का याय्ता ज्या याडः वगु खाँ काडः दिल । वयक कर्मचारी पिनिगु दशवी थवय् ग्वाहाली व साथ दःसा संस्थाता भिंजुइगु खाँ नपां कर्मचारी पिसं थःगु ज्या, कर्तव्य व अधिकार थुइकः जुयमः धायो दिल । उगु भित्तेपात्रो पित ब्वज्या, बिस्का जात्रा व न्हूगु वर्ष २०८२ या भिन्तुना कालबिल ज्या इवःसं एशोसियसनया प्रशासकीय अधिकृत दामोदर सुवाल, कानून अधिकृत गणेशलाल फाँजु, एशोसियसनया नेम्हा दुजःपुं विद्यालक्ष्मी प्रजापति व रामकृष्ण प्रजापतिं नं न्वचु तयो द्यगु खः ।

## आधारभूत सुज्या सुयगु तालिम क्वचाल

चैत्र २९ गते

खवप नगरपालिकाया ग्वासालय न्ह्याकगु खुलाया आधारभूत सुज्या सुयगु तालिम बुटिक व साँच्याकिगु तालिमय् दसिपौ लःल्हाय्गु ज्याया मू पाहाँ खवप नगरपालिकाया उपप्रमुख रजनी जोशीं नगरपालिकां सम्पदा ल्यंकः म्वाकः तयगुलि विशेषः बः याडः वगु खाँ नपां लोकहवागु बिस्का जात्रा भीगु म्हासिइका जूगुलिं सभ्य, भव्य व सुसंस्कृत काथं हानय्मःगु अलय् खवप दे शैक्षिक गन्तव्य नपां खवप विश्वविद्यालय चाय्केता संघर्ष याडः वगु खाँ काडः दिल ।

देशय राजनैतिक परिवर्तन नपां देशय व्यवस्था ह्यूसं अवस्था मह्यगु खाँ काडः दिसे वयकलं जनताया अवस्थाय् ह्यूपुपा ह्यगु खःसा समाजवादी गणतन्त्र ह्यमःधायोदिल ।

ज्या इवः या सभाया नकीं नपां महिला बालबालिका समाज कल्याण समितिया कजि नपां कार्यपालिकाया दुजः रोशन मैयाँ सुवालं खवप नगरपालिकां ल्यासे ल्याम्होपुं मिसा मस्तयता लाहातय् ज्या दैगु सीप बियागु मतिं तालिम बियो वयागु खाँ काडः दिल ।



आधारभूत सुज्या सुयगु तालिमया स्यनामि धर्मलक्ष्मी लघुं खवप नगरपालिकां वि.सं.२०२४ साल निसें तालिम न्ह्याकः वगु खाँ कुलः दिसे तालिमं सयकागु ज्ञान व्यवहारय् छ्यलयता इनाप याडः दिल ।

मू पाहाँ जोशी जुं तालिमय् दुतिंपिन्ता दसिपौ व स्यनामिता लयता पौ इडः दिल । ज्या इवः सं वडा या नेम्हा महिला दुजः पुं विष्णु केशरी दुवाल (४) व सुमित्रा बोहजु (८) नं न्वचु तयो द्यगु खः ।

## वंशगोपाल फल्चा उलेज्या

चैत्र २६ गते

खवप नगरपालिकाया प्रमुख सुनिल प्रजापति जुं वंश गोपाल फल्चा उलेज्या याडः दिल । वडा नं ३ या उगु फल्चाया ल्याचा नं पिब्वगु जुल ।

नगर प्रमुख प्रजापति जुं सम्पदात ल्यंकः म्वाकः भिंकः तय्गु ज्याखय् जनतां निःस्वांगु उपभोक्ता समितिपाखं दयकगु बांलाकः भिंकः थःगु भःपिइगु अलय् ठेक्कां अथे मयासें लबः जक स्वइगु खाँ काडः दिल । सरकारया भरय् मच्चसें थःगु हे तुतिखय् दाडः ज्या संगुलिं खवप दे थौं या अवस्थाय् थ्यंगु खाँ काडः दिसे पर्यटकपुं छकः मवसें मगागु गन्तव्य स्थल काथं हज्याडः च्वंगुलिं नगरबासीपिसं अज सचेत जुयमः धायोदिसे वयकलं देशं दुनय् व देशं पिनय्या पिसं

स्वयो च्वनिगु बिस्काजात्रा सभ्य, भव्य काथं क्वचाय्केता इनाप याडः दिल ।

फल्चा पुनः निर्माण उपभोक्ता समितिया नायो रामसुन्दर खाताखों ल्याचापिब्वसे २३ लाख व चय्प्यट्टया लगत इष्टमेट जूगुलि १२ लाख व हिट्ट तकां फल्चा दानय्गु क्वचःगु खाँ काडः दिल । खवप नगरपालिका वडा नं. ३ या वडाध्यक्ष राजकृष्ण गोराया सभा नायोलय जूगु उगु ज्या इवः सं कार्यपालिकाया दुजः सुनिता प्रजापति, वडाया दुजः राजकुमार सिल्पकार व सम्पदा शाखाया प्रमुख राम गोविन्द श्रेष्ठ जुं फल्चा दानय्ता ग्वाहाली यापुं सकल सिता सुभाय देछायो दिसे फल्चा भिंकः तय्ता सकलसिता इनाप याडः दिल ।

## बिस्का जात्रा २०८२ या सदभाव न्याली

चैत्र २८ गते

नेपाल मजदुर किसान पार्टीया छ्याञ्जे नपां संघीय सांसद प्रेम सुवालया मू पाहाँल्य् खप नगरपालिका वडा नं ९ दतात्रयं न्ह्याकगु बिस्का जात्रा व न्हँगु वर्ष २०८२ या भिंतुना न्याली तः माही थ्यंकः सभा सुरु जूयवं मू पाहाँ सुवालं राजनीति निःस्वार्थ देश व जनताया सेवाया लागिं खः अलय देया चाकलिं विकासया लागिं जनताकय् राजनीतिक चेतना ब्वलानय्मः धायोदिल । वयकलं आधुनिक युगय् सञ्चारमाध्यम व सामाजिक सञ्जालं खपया म्हासिका ब्वयो च्वंगु मूर्त व अमूर्त सम्पदा नपां स्वापु दःगु लोकं हवागु बिस्का जात्रा देशं दुनय व देशं पिनयया पर्यटकपिसं प्रत्यक्ष स्वइगुलिं जात्रा सभ्य, भव्य व सुसंस्कृत काथं हानय्गु भी फुक्कसिया कर्तव्य खः धायोदिल ।



सरकारं देया माथां वांक विकासयाय्ता विदेशं वइगु रेमिट्यान्सया भरय् मच्चवंसं थःगु हे देशय् थःगु हे श्रम व सीप छ्यलः ज्या याय् फैगु वातावण दय्के मःगु अलय देया अर्थतन्त्र म्वाकः तय्ता हाकुब्यापारीतय्ता पानयता जनतातत सचेत जुयमःगु खाँ ब्याकसे वयकलं खप दे चामहयूसा बागु संसार चामहिलागुति ग्यनिगु खाँ इलय व्यलय चाह्यू भाइपुं विद्वानपिसं न्हिथांगु खाँ कुलः दिसे खपया सम्पदा व संस्कृति दुनयया न्हपानिसं डायकः वयो च्वंगु बिस्काजात्रा छुं हे कुखियगु थाय् मदय्कः डाय्के मःगु खाँ काड दिल ।

ज्या इवः या सभाया नायो नपां खप नगरपालिका प्रमुख सुनिल प्रजापति जुं बिस्का जात्रा बांलाकः हानय्ता चैत्र १४ व १९ गते स्वापु दःपुं सकल नपां बैठक च्वडः मः काथंया फुक्क

ब्यवस्था याय् धुंगु नपां बिस्का जात्रा स्वयता देशं दुनय व देशं पिनय्या द्रलंद्र मनूत थाना हे स्व वइगु नपां थी थी सञ्चार माध्यमं हलिमयया जनतां स्वइगुलिं जात्रा बांलाकः व्यवस्थित व सभ्य दयकेगु सकल नागरिकपिगु मंकः कर्तव्य खः धायोदिल ।

खप दे सांस्कृतिक नगर नपां म्वाडः च्वंगु म्युजियम काथं म्हासिका पिब्वय फःगु खाँ ब्याकसे वयकलं सन २०२३ य् नेपः भ्रमणय् वपुं मध्ये प्यब्वय छब्वं खप दे चाह्यू वगु खाँ काडः दिल । देशं दुनय व पिनय्या पर्यटकपुं सालय्गु मतिं मंसिर २८ गते निसं पुस २ गते तक 'खप महोत्सव' तः जिक हाडागु खाँ काडः दिल ।

खप नगरपालिकाया उप प्रमुख रजनी जोशीं न्यालीसं भःपुं जनप्रतिनिधिपुं कर्मचारी, संस्कृतिकःमि, सुरक्षाकःमि नपां नगरबासीपिन्ता सुभाय देछासे भैलखः वास्तुकला, भूकम्पीय, सामाजिक, ट्राफिक व स्ट्रक्चर याडः डागू इन्जिनियरिडया ज्वःमरुगु नमुना खः धायो दिसे बिस्काजात्राया मुख्य स्वयगु काथं थौं निसं भैलखः लुइगु जात्राता सभ्य, भव्य व सुरक्षित काथं डाय्केता सकल नगरबासीपिनिगु साथ व ग्वाहाली दैगु आशा प्वंकः दिल ।


प्रमुख जिल्ला अधिकारी गोपाल प्रसाद अर्यालं बिस्का जात्राया लिधंसाय् अन्तरराष्ट्रिय लागाय् म्हासिका कःघाडः च्वंगु गौरवया जात्रा खः धायोदिसे बिस्का जात्रा थजगु अमूर्त सम्पदाता न्हँगु पुस्ताता लःल्हासे यंकय् मःगु खाँ ब्याकसे जात्रा व्यवस्थित याय्ता

सुरक्षानिकाय पाखं याय मःगु फुक्क तयारी पूवांगु खाँ नपां जात्रा बांलाक हानय्ता सकलसिता इनाप याडः दिल ।

ज्या इवः सं गुथि संस्थान खपया शाखा प्रमुख खिमा ओलीं गुथिसंस्थान खपं चैत्र २८ गते न्हिनयसिया ३:०० ताइलय हे बांलाकः जात्रा क्वचाय्केता पुजारी भैल नायो नपां नगरबासी पिनिगु ग्वाहाली प्वडः दिसे ई नपां बिस्का जात्रा नं भिंकः बांलाकः न्ह्याकः वगु नपां नेगु भैलखः व नकिंजुखचा दयके धुकः जनसमुदायता लः ल्हाय्ता तयारी दःगु थानाया चलन काथं थःनय व क्वनय सालिपिसं मर्यादित काथं सालिगु विश्वास प्वंकः दिल ।

ज्या इवः सं वडाध्यक्षपुं योगेन्द्रमान बिजुक्छुं(५), रविन्द्र ज्याख्वं(९) नं न्वचु तयो द्यूगु खः ।

सम्पदा लयंक: म्वाक: तयगु इवलय् सिज फल्वा नि:स्वान सा नपां  
वंशगोपालया फल्वा उलेज्या जुल



खुल्लाया बुटिक तालिम क्वचाल

(२०८१ चैत्र २९ गते)





नगर श्यागु जिम्नास्टिक धिंधिं खल्लाया ठलेज्या  
(२०८१ चैत्र २३ गते)



नगर श्यागु जिम्नास्टिकया धिंधिं खल्लासं ख्यप नगरपालिका ठहाप  
(२०८१ चैत्र २४ गते)